

MUTTHU ONTTHYAWA

OHOOLO WA APWIYA



Nrowe nuuramihe muru. Muluku Oophentiwa, nootteeleliwa murima oxekuw'ola mwaha wo oreeriwa nno orinaahu wo othukumana emaara ekina. Nto Nyuwo paahi, Pwiya, munsuwela moota mirima sahu sinwehereryakaaya ewoora ela okathi onweryahu weemela-tho ohoolo wa atthu Anyu va, ni oruuha Mutthaka ola yoowo veekumixa ninooaahu okhala vovaakuveyaxa ewoora ela. Nyuwo moonivaha mahiku ala vakhani vano, nto ninnivekela, Muluku ootthuneya, wira ntata Nanyu na omoriwa ikharari sikhale mwa hiyo, wira sinihoolele ni sineettiherye. Ni munivahe itthu iye simphavelaahu, Pwiya, tthiri, murima ahu onnitthunaxa woosuvelani oratta-ene.

² Hiyo ninnoona ematta yuulupale yo ohepha, yootteela, yoottokottha, ni noosuwela wira enuku ti yoolikana vano wa okathi wuulupale wo weepettha. Muluku Oophentiwa, ninvekela wira Nyuwo mutthukule nikatamphe ninnikhuneela, munihiye nikhale Ohoolo wa Mwaana vano, mahiku ala vakhani anoorwa, ni munittokotthiherye Omwene wa Muluku.

³ Mureerihe khula nsipo ninrowa wimpwa. Mureerihe khula mavekelo, ni mwaakhule khula nimosa ninrowa wiiriwa, Pwiya. Nwoopole othene arimeenle. Nwiitthanele otthikela mpaani mwa Muluku mukumi, ni opatthana, ale yiihulunxe.

⁴ Ninnivekela, Muluku, wira munvonihe khula mutthu onwereiwa onvolowa vathi va nipatho nahu. Munivahe, Pwiya. Ohikhale hata mutthu ootteettheya eriyari ahu wookiseryani wa mithukumano iya.

⁵ Ni, Muluku ootthuneya, vano wa hiyo, hiyo ninihimya okathi ula okhala Ekereja, ale Yiihaneliwe okhuma, ale ari molumwenkuni mothene akhumme oPapilooniya ni wira yiire mpantte wa opatthana nno wooreeraxa nihiku nla nookiserya, ninnivekela, Muluku, wira Nyuwo mureerihe murima ahu mwa enamuna khata. Hiyo tthiri noovoliwa etala, Pwiya, ni oowiisiittha itthu sothene sa molumwenkuni, ninsuwelaahu. Pwiya, hiyo noohiya miritti sothene sinnirukurerya vookhweyavo, nto vano munihiye nitthimakele muteko ola n'uvilela, omphwanyaneya ohoolo wahu. Munivahe, Tithi. Ni wira nikhale aKristu, oomalelaxa, oolipa saana, ooloka, woomalelani wa muteko ola, ovikana saaryahu nivolowaka. Muluku aphwanye ovuwa wothene, vano ninvekela mwa Nsina na Yesu. Amen.

⁶ Kinoona wira ola mureerelo muulupale, ohiy'ula, kiweherenrye aka mwa okathi khata. Nihiku nlo miyo kaaleela

amwaar'aka, miyo kiirale, "Kinkhala oowuukhuwa saana, kilipelelaka ophiya otapernakulu." Miyo paahi . . . Kookhalana apatthani akina, tthiri, kookhalana, mulaponi mothene, masi etapernakulu ela va yookhalana etthu y'omeekha.

Miyo kikumihiwe etthaya ela va, okathi Muluku okivahalyawe ekumi elapo ela ya vathi; ni kinoona wira, Owo apisa vale, kinrowa ovithiwa wenna nipuro nlo. Owo aarwaaka, Owo onrowa okiphwanya wenna nipuro nlo.

⁷ Masi, enkhalala wira, yookhalala etthu, kapacerya-ru wuupuwela oJeffersonville. Nihiku nlo kaahiisoonaa okhalaxa mekhaakha; miyo khwaahimeerya amwaar'aka, miyo khwira, "Wookinkhela owaani, ni nkisuwenle xeeni okinkhelenle aya, voohikhala wira atthu ale akivekelelaka." Miyo khwira, "Ahe, miyo ki. . . Etthu emosa paahi ensuwelaaka wira otthika ni okhalana mahiku vakhani a muthukumano, noone nahaakhanle oophwanyaka etthu okhuma w'Apwiya, khino Awo antthuna wira nisuwele etthu."

Ni mwaha, muulupale w'ekumi orinaahu ohoolo wahu naanaano va ti *Othelana Ni Omwalana*. Ni yakhala yoohoverya, ohaana okhala waakhula. Khekhanle okhalaka yoohoverya ohikhanle waakhula. Hata wira exeeni, ohaana okhala waakhula. Apwiya yatthuna vale, kinthuna kiphavele olavula yeeyo, Ttiminku voosiisu.

⁸ Vano nto, meelo ohiyu, kinoona wira eri wira nikhale wenna o. . . Exikola ele eniihaniwa sayi? [Munna Neville oniira, "Parkview."—Mol.] Awutitooriyu Parkview. Exeeni, mulopwana? ["Parkview Junior High."] Parkview Junior High. Akavi ansuwela oryaaya? Ahe, kinoona wira awo anoohela mapawe, kahi siiso, Munna Neville? ["Ayo."] Okhala. . . Eri wenna nno ntoko—ntoko ipantte tthaaru sa emiilya emosa, ni nnookhala nipawe n'othoonyerya. Munoorukunuwa, mmuhiyaka rampha. Empa yooreera yoottukhuwa. Aakhala mapuro mukhanlyanyu wookolaka moonoo, ni olepa entthunaanyu olepa, ni—ni—ni itthu siiso. Ni kookupali wira enimoosivelani ni vanci-ene ohiya okhala, oophunyana mmithukumanoni nno mu—mutapernakulu. Onookhala opuro munci-ene, opuro munci-ene wo opweha-vo mikukutta.

⁹ Vano, kinoona wira awo aakhala yooruma emosa naarinaahu ovarihanaka wira ninootthara, yaari, ohiphiya nipuro nene mpakha ewoora ya neethanu na mosa ni minuutu miloko miraru. [Munna Neville oniira, "Kahi mpakha iwoora thanu ni minuutu miloko miraru; ohikhala weiwo ehinatthi ewoora ya neethanu ni minuutu miloko miraru."—Mol.] Ni ewoora xeeni. . . ["Mikhora sinhuliwa ewoora ya neethanu na mosa ni minuutu miloko miraru."] Kookupali wira waamukhala

muupuwelo wooreera ophiya-wo ewoora ya neethanu na mosa ni minuutu miloko miraru.

Vano, awo aakhalana awutitooriyu mukina nno mpooma ankela-mo atthu ikonto thanu na mosa. Naiseettiha-ru saana mwa ola, khino okathi p'ukathi anoonihiya omurumeela mukina wa muthukumano muulupale, okathi p'ukathi elimwe ela katthikaru ilapo s'okhopela.

¹⁰ Ni siiso kinoona wira ninoowerya owaakhela mpakha. . . Akavi nikhanle ahu owaakhelaka iwe? [Munna Neville oniira, "Ninoowerya owaakhela oophiyaka ikonto xexe."—Mol.] Ikonto xexe. Tivo, moone, ninookhalana opuro onrowa ohala. Khunrowa okhala waakuva. Nto siiso murwe ewoora yaanethanu na mosa ni minuutu miloko miraru. Vano nto atthu othene anoowerya ovolowa okathi wootthuneya, atthu othene vamosa, ni kookupali wira nyuwo—nyuwo munookhalana opuro wooreera. Ni ti woottukhuwa-vo sa, ni—ni nipuro munweryaanyu olepa ni okweretha soolepa, ni siiso. Ni eyo enrowa opacerya, Apwiya yatthuna vale. . .

¹¹ Kinoona wira vano, olelo ohiyu, okhalaka wira ola muthukumano wa mavekelo wa Namararu ohiyu, nihaana. . . Nipuro nihanle osareya, vano miyo kinoona wira khino vanreerela nipacerye meelo ohiyu. Hiyo nirenttenri niroromelaka wira khino, naakhanle nummero noophiyerya wira ekhale eyaattelo va, naamuwerya orowa iwe. Masi kookupali wira ti. . . yaamukhala yooreera orowa, khamunuupuwela siiso, Munna Neville, orowa wuuwu meelo ohiyu? Ni akavi anuupuwela wira owo waamukhala muupuwelo wooreera? Vano nto nyuwo munoowerya okhalana o—opuro onihala. Yo—yoorentteriwa; yooliviwa ni axinna amosa-amosa mukereja mu. Nilinvwe itoolare miloko mithanu paahi khula ohiyu, ekhanle saana, saana. . . Kaanitthuna kikkhalanne-ene yeeyo mapuro othene, naarowahu owerya owaakhela anci-ene siiso ni itoolare miloko mithanu ohiyu umosa, empa esya, epaaluku yooreera. Ni, masi hiyo na. . .

¹² Vekeekhai, hiyo ninookuxa soovahiwa, wooka waka. Ni khaninithuna wira axilopwana awo alive yaawo ene; hiyo ninooliva. . . nnimwaahokoloxerya. Masi nakhalana-ru soothuma sahu n'itthu, ahe, nto, vekeekhai, hiyo ninoohiya okuxa soovaha. Hiyo khani. . .

¹³ Yaakhanle-ene aletto ni hiyo, nookhalaha yooruma, ohikkhalakhala nivekaka, oroka, waakhenyererya atthu wira ekumihe musurukhu. Ninviriha muhasa wo osokha, ekhanle paahi. . . Owo mwiirelo wa etiini. Kiheererya, imaara sinci-ene, hata ohiviriha muhasa wo osokha, nnakhala, masi khenvara etthu. Munnona? Okhala wira, ovaha epante wa etiini ahu. Eyo epante ya muteko ahu. Khivancala yaakhanle-ene esentavo

emosa paahi, wala enakhaleru exeeni, wala esentaavo emosa, yothene ti. . .

¹⁴ Vano muupuwele, Yesu aahimoona naamukhweli mmosa aviraka vale, nihiku nimosa, vaavo axilopwana athaaciri yaahelaaya-vo munci-ene wa muhakhu aya munivukuni mwa muhakhu. Nto naamukhweli ola khuvira vaavale, khino anamwane aili, yaavoliwaka etala envirelaka, ni nto khuvaha sothene saarinaawe, misurukhu mirarau sa esentavo emosa. Nto Yesu khwira, “T’ani olinve woowaatta?”

¹⁵ Vano, miyo keemenle-ru vaavale, kaamwiira, “Muhiire siiso, munna. Hiyo—hiyo, nkawehani, khanireerane musurukhu.” Masi Owo khaamweemenxe. Munnona? Owo—Owo aanisuwela wira Owo aahikhalana etthu yuulupalexa ohoolo. Tivo, moone, khupe, owo aahikhalana etthoko Moovuwani, weiwo aarowaawe. Ni Owo khaamukhootinhe. Owo aahimuhiya ohela isentavo sawe tthaaru, okhala wira yaari wira owo aatthuna wira paahi. Ni owo aahaana otthuna wira yeeyo; ni anamwane, ni naamukhweli, ni isentavo tthaaru paahi wira akhaleke ni seiyo. Owo, owo aahaana otthuna wira yeeyo. Tivo, moone, atthu yaatthunaka ovaha, ahaana ovahiwa okathi wo wira siiso.

¹⁶ Masi kinniwuupuwela ala aneemela, ni atthu yiraka, “T’ani onrowa ovaha itoolare miloko mithanu? T’ani onrowa ovaha itoolare miloko miili?” Kinoona wira ti yoonanariha o—akhili anyu. Miyo—miyo kinoona wira atthu annisuwela wira ontthuneya musurukhu wira—wira okhalaniwe mu—muthukumano. Ni nkaarowa waahiya wira, alipa-ooweetiherya muteko. Miyo kiirale, “Waphiya-ru okathi murinaanyu wira yeeyo, nto p’ukathi wa miyo otthikela otapernakulu. Tivo, khanirina wiiraka yeeyo.” Masi miyo—miyo kinoona wira nihaana oviraha muhasa wa soovaha, wira—wira nikhalihe woomalela muteko w’okokhorela wa etiini.

¹⁷ Ni siiso alakela onaamuvirihiwa muhasa mwaamukhaani wa soovaha khula ohiyu, enoohimmwa etthu ntoko, “Ahe, ninrowa osokha soovaha vano.” Ni onoovirihiwa muhasa wa soovaha, nto eyo—eyo enrowa okhala emalelo aya.

¹⁸ Ni khula ohiyu, Apwiya yatthuna vale, kinoona wira Apwiya aahela vamurimani vaka Mutthaka mmosa woomaliherya wa Ekereja. Kinnikhalaka mahiku manci-ene mmavekeloni. Ni nkinrowa okela mwa yeeyo, okhala wira yookhumelela yuulupale yaahiiraneya nihiku nlo yaari yooreera saana. Ni kiri oohivilela wira kooleleni yeeyo. Nto vano, mwaha muulupalexa, wona waka, yoowo ntoko anci-ene aya, Billy ohimye wira, yaalikari aya, waari mwaha wa *Othelana Ni Omwalana*. Yoowo, okhanle muulupale—mwaha muulupale, ni miyo—miyo nkaasuwela moota wo ohimya. Nto miyo khurora ovekelo mwaha wa yoowo, nto Apwiya khukumana ni miyo. Ni koosuwela wira miyo, ni. . . Nkirina, masi Muluku ookinnya;

Kookhalana vano. Muluku ookivaha waakhula wooloka, moone, moone, ni miyo—miyo koosuwela wira ekeekhai.

¹⁹ Nto siiso miyo nkisuwente oratta-ene nlelo, khino, Ttiminku pooti waavekela axinn'ihu athiyana wira ehimye muthukumano, yaawo mmansaya, masi miyo—miyo nkisuwente. Yaamukhala vootthariha vaakhanle wira axithiyana ootheliwa yatthuna orwa ni axiia aya. Sookhala—sookhala itthu kamosa-kamosa s'ekumi sirina ohimmwa, ekeekhai ya yeeyo, ni moota. . . Ni siiso hiyo ninthuna nooniherye mara, ya SIISO ANIHIMYA T'APWIYA, nto nyuwo munookhalana. Nyuwo munoosuwela ele ekhanle Ekeekhai nto. Ni miyo kinaaroromela Yaawo wira yeeyo.

²⁰ Nto, vano, miyo kaari orestaurante nno nihiku nlo, kilyaaka, ni—ni Jerry ni othene aya yoolipelelakani nyuwo othene. Awo yiirale, yiirale, "Ahe, hiyo. . ." Amosa-amosa, mmosa w'aximiravo aari weiwe, khwira, mmiravo ola khwira, "Kinimoorwa nno vanci-ene esumana ela," khwira, "awo aakhalana. . . Ahiiso, isumana iya piili sinrwa." Khwira, "Awo aakhalana mu—muthukumano nno, wa pasketepoli, wala etthu siiso." Khwira, nto khwira, "Branham ori iwe, onrowa okhalana muthukumano." Owo khwira, "Kinrowa waavaha yoolya atthu anci-ene." oRanch House, nimosa wa mapuro ale iwe. Ni yaari. . . yaari ooreera murima vekeekhai.

²¹ Ni miyo kinnixukhuru mwaha wa nyuwo othene, okhala wira awo tthiri ahoottotopelani ni aahimya itthu sooreera sa nyuwo.

²² Mulipa-ookhapelela oRanch House aahikumana ni miyo voosisu uwo. Kaaphiyale ntoko ewoora yaneli ni minuutu miloko miraru, okhuma wArizona. Nto owo khwira, "Ahe, Munna Branham," khwira, "Kihiiwa wira munoorowa okhalana muthukumano mukina." Khwira, "Kookhalana mukhaliheryo mukina," owo khuhimya. Ni khwira, "Vano kintthuna kihimye etthu emosa, wira atthu ale anrwa okhuma iwe," khwira, "awo vekeekhai atthu ooreera murima." Vano, eyo yaahikooniha oreera saana vekeekhai mwaha wa nyuwo, moone.

Okhala wira, tthiri, kinnoona wira nyuwo mwa axaana aka, ni miyo—miyo, wala anamwane, kiireke. Nto siiso miyo. . . *Axaana* nihimimwa epuri, ni nyuwo khamuhiyo ipuri. Nyuwo mwa amwaapwittipwitthi aka. Ankhi yeeyo? Nyuwo mwa amwaapwittipwitthi a Apwiya Awo akihiyenryaya wira kaalyiheke. Ni kinniroromela wira eno—enoo. . . wira Awo anookihiya wira yeeyo. Nineetta nittharaka ephiro.

²³ Ni wa mwaha ola wa *Othelana Ni Omwalana*, kinnitthunaka olavula yeeyo okhuma okathi wa Ikanyeryo iye Thanu na piili. Nyuwo moosuwela, isir-. . . Isiiri sothene saahaana osuwelihiwa mwa seiyo, sitaphuliwaka Ikanyeryo iye Thanu na piili, isiiri sothene sa Bibilia. Ni kinimuupuwela vano, kikhalaka oowuuluvala vakhani, miyo—miyo kinoona wira miyo. . .

Kuupuwela wira vaareerela kihele mufiitani mano, yaakiirale etthu, nto khino Ekereja yaamphavela osuwela, “Kaatthuna kisuwele etthu owo aarinaawe mmuupuweloni mwawe. Aarowa ohimya exeeni?” Ni myaha iyo sothene sinkhala ntoko soolipaxa; Kinoona wira, e...ni mukhaliheryo w’Apwiya, kinoorowa wehererya wooruuhelani. Vano nto—nto yakhumelela etthu, ni miyo karowa Awo ahinatthi orwa, nyuwo—nyuwo munookhalana eyo yookaravariwa nto.

²⁴ Kinoona wira nookhalana iliivuru kamosa-kamosa sikhumme. Kinnimoona Munna Vayle muthiyana; nkisuwenle sintoko meetiku ene ori vaava wala nnari. Owo ori vaava, Munna Vayle muthiyana? Owo khino ori vamuthukumanoni. Nkinimoona. Masi, oh, ayo, ottuli saana. Nto Munna Vayle oolepa eliivuru, ni eyo e...Kuupuwela, kinoona wira yoohimmwa olelo, piili. Munna Vayle, eyo ekeekhaii, nyuwo mookhalana piili va naanaano va? Iliivuru piili. Vano, nkisuwenle, miyo...Enamuna kinuupuwelelaaka, wira khula mutthu onaakhela ekoopiya emosa. Tivo miyo...Nyuwu mwa...Ti siiso kinuupuwelaaka. Khino koovonya mwa yeeyo.

²⁵ Vano nto *Wakathi Mithanu na Miili sa Ekereja* soomalihiwa (Eyo ekeekhaii, Munna Vayle?) ni soothittiwa vano. Ni koosuwela wira nyuwo munoottthuna ophwanya, okhala wira sinnaakhula sookoha sinci-ene sinkhalaka mmurimani mwanyu. Vano nto nuumala yeeyo, ahe, ninrowa ophavela otaphula *Ikanyeryo Thanu Na Piili*, moosuwela, muliivuruni, wira khula mmosa awerye osoma mwa enamuna o—ontthunaawe, awerye osuwela saana n’usoma. Kinoona wira yalempwa, vakhala wira... .

²⁶ Yoopacerya, nikuminhe eyo mufiitani, enamuna elempwe aya ahiiso elavuliwe aya. Moosuwela, nyuwo pooti olaleya mutthaka, etthu emosa, vano nto olepa eliivuru ekina. Moone, ntoko kaakwanyale mwaha mmosa, ntoko wira koohimeenryeni, nyuwo mwaamusuwela saana, kiirale, “Vano, epyo y’enowa,” moone.

Ahe, vano, namasoma a eliivuru iyo, mwaakuminhe-ru yeeyo, aamphavela osuwela, “Epyo y’enowa exeenii?” Munnona? Ni khaarowa osuwela. Yiraneieye eyo ophiya nipuro ntoko Princeton wala nipuro siiso, nto awo—awo yaamuupuwela wira hiyo khanihiyo atthu oosuwela.

Tivo kimpchwannye aka Munna Vayle wira akikhaliherye vakhani yeela ni okhalana enamuna ya muupuwelo mmosaru, ni olakiherya elavulelo. Ni kookupali wira elavulelo aka awo yaamu... Yaamukhala mwiiriirya wa awo, vekeekhai. Tivo e... Munna Vayle t’osuwela saana yeeyo, tivo owo ori ntoko e... .

²⁷ Vano nto, mwa yeeyo, kinoona wira munn’ihu oophenteya khino oophwanya muupuxeryo mukina, mwa enamuna emosa, ni ohimmye wira aamurowa olepa iliivuru piili mwa ekontha awe,

ntoko sookumihiwa, wa yoowo. Nto siiso owo khulepa emosa eniitthaniwa, kookupali, *Profeta A Eseekulu Yanamiloko Miili*, ni ekina, *Ekereja Ya Lawotiseya*, kookupali, wala etthu siiso.

²⁸ Ni Billy ookileela wira, olelo ohiyu, kinaamini aka wira ikonto sinci-ene sa seiyo siphiyale olelo; ookhala oruuhale okhuma oTexas. Nto siiso, sinrowa okhala vaava. Ni enoohimmwa, woona waka, sinakhale-ru exeeni. Kinoona sooliveriwa. Nkikupanli. Ni saaliveriwe-ene, munoovahiwa, moone, nave, mahala. Ni ninwehererya wira sinimoosivelani. Ni soosivelani vale, nvahane ntata ni Munna Vayle ottuli iwe mmulele moota munxukhuru anyu. Miyo nkiphienrye osoma, yoomi. Kaasomme-ru, khino kaamurukunuwa muupuwelo vanaasiwa yeeyo, tivo kinimwehererya osoma esumana yeela kirine-ene okathi, kawerya-ru.

²⁹ Vano okhalaka wira ohiyu wa Namararu, muthukumano ahu mwa yooruma ompacerya meelo ohiyu. Masi kinoona wira, kikhalaka va eriyari anyu, miyo—miyo—miyo nkaawenrye okhala owaani iwe tu ni—ni osuwela wira nyuwo othene mwaarowa okhala nno. Miyo . . . Ntoko paahi, moosuwela, ntoko okathi amosa-amosa wa amusi anyu amphiya aya, moosuwela, nto nyuwo khunatthimakela mphironi wira mwakumane ni yaawo, moosuwela. Nto—nto miyo—miyo kihuuuwela ophiya ni—ni owaakhelani oJeffersonville. Nto siiso esumana ela evinre miyo kaahalela . . .

Nnari, kileveleliwe, soovira isumana soophiyaka tthaaru, kiruulyaaka owaani. Kaari ota kiphavelaka o . . . Kaari mmithukumanoni kamosa-kamosa wArizona wu, nto kitthika wira kiphavele wiitthyuuwa. Ni kirowa mukwaha wo oxaya, nto miyo—miyo kimphwanya mwatto recorte oowunnuwa ntoko elapo ya wArizona. Kaamweettinhe imiilya miloko miili sa etakhwa wira kimwiive.

³⁰ Masi nto wuupuwela, nnya, wira nkinatoko wuupuwela kiryeene mwammiravo . . . Wira kooniherye paahi moota itthu iya siniiraneyaya, empa yaamukhaani Apwiya anivahale aya iwe, wa miyeeri onkhalaahu weiwe, ni exikola wa anamwane.

Miyo kaari mwammiravo. Kinoona wira Jimmy Poole onookhala vaava olelo ohiyu, khino atithi awe ari vaava, Jim tiithi. Nisomme hoothe, ni kinnuupuwela kiryeene iwe, ntoko mwanamwane oothaleliwa, ni ixapattho, iteeni, ikatha vate; kaamoolelaka epaphelo mmosa, ni elaapi mukina.

³¹ Kaanilepaka ipowesiiya. Nto Muhano Wood, va, aahikivekela wira kitharihe ele oxekuwa ola mufiitani, ya Ford aka a khalayi, nyuwo moosuwela, ni ti—ti yooreera. Vano, owo khwira, “Ahe, nyuwo mwaahaana onveleliherya Mwenye Ford.”

Miyo khwira, “Khereerane ekeekhai, kookupali,” mwaha wa onyakula ohoolo, ni wunla ottuli, ni ovelaveliha wa eleemi.

Masi miyo...Ti—ti e...Masi kweekwe kinnihimiyaka, etthu emosa paahi kaarinaaka wira waari waalaka ipenewu xexe, ni ottikinya voophiyerya wira epatte vano nto ovolowa-mo. Miyo kiiraka, “Yaari yooreera kapacerya-ru owela ntumuxa ni yeeyo, kaamuwela murima-murima paahi, kiiraka, ‘Kinoona wira kinniwerya, kinoona wira kinniwerya, kinoona wira kinniwerya.’ Nto yaampacerya, epannte ekina, yiiraka, ‘Koono wira kaaniwerya, koono wira kaaniwerya.’”

Ti siiso ninwelaahu mwaako ola, ntoko *Okelela Ohoolo Wa Nawetta*. Siiso hiyo . . .

³² Miyo kaahikhalana epoweema ekhaani kaalempe aka, etthu sa. Nto yiiraka . . . Vano, muupuwele paahi, kaarina miyaakha soophiyaka muloko ni miili paahi. Nto keemenle-ene iwe, nihiku nlo, kiwehaka ekhato ele osulu, ni kuupuwelaka, “Mwatto ole onrowa okhala vaava musaala mu, awehaka vacanelani,” vacanelani ya viituru. Miyo kuupuwela epoweema yaamukhaani. Miyo kirowa kikuxa, etthu sa. Muupuwele paahi moota Muluku . . .

³³ Munnaamini wira Muluku ori mwa muupuxeryo wothene? Muluku ohaana olepa nsipo. Munnaamini wira Muluku ori mmasiponi? Yesu ohimmye siiso. Owo aamuhimmye Davidi, “Khamunsuwela etthu Davidi ohimmyawe mwa Masalmo? Moosuwela, wira kherina . . .”

³⁴ Nkoonani okhomeliwa wene vamwiikimanyo. Davidi aahiipa, mwa Masalmo 22, “Muluku Aka, Muluku Aka, mukinyanyalenleni? Makhuva Aka othene, annikiweha. Awo anthorola matata Aka ni inawu Saka.” Moosuwela, nto nlo naari nsipo. Masalmo n—nsipo.

³⁵ Ni mupowesiiyani mu, nwehe paahi moota eniireyaaya. Kikilaanthe-ene iwe mwammiravo ni epaphelo, kiirale:

Wookinkhela, oh, wookinkhela okuusini iwe
woorakama-wo,
Weiwo miyuuttutthi simmoraya vathixa
ovikana veekhatoni va mwaako.
Kinniwerya omoona koyote eettaka
vanakhutuni ooxeerya,
Kinniwerya omwiiwa mwiiici okhuwela iwe
axinama ansukihwaya.
Ni nipuro nlo okhatoni kinniwerya wiiwa
wunla wa mwatto,
Miyaako iye ottaiwene Catalina, muhina mwa
wArizona.

³⁶ Miyaakha miloko mixexe ohoolo waya, kiphwanyaneyaka veekhatoni vene vaavale, mwatto ole akiwehaka wiitho.

O Muluku, wookhala Muttetthe okhopela wa muro nipuro nlo, apatthani. Eyo paahi...Ohaana okhala-wo. Munnona? Khivanreere—khivanreere olavuliwa yoowo. Itthu iya sothene

khasihiyo ihantisi paahi; iyo ti . . . Iyo ti s'ekeekhai. Iyo ikeekhai. Nkireere otteeliwa murima okhala va olelo ohiyu, okhala n'atthu ala kinwehereryaaka okhala ni yaawo Iwe mahiku othene, weiwo ohinrowa okhalawo-tho eretta, wala okhwa, wala ovalaana. Ni weetta mukwaha khunrowa okhala etthu wa hiyo nto.

³⁷ Vano, kinoona wira khuwaavo muthukumano onkhala woomalela ahisommwe Masu ni okhalana vakhani . . .

Munna Neville, miyo kinoomalaru orwa va. Billy ohimnye wira mwaathuna wira kilavule. Yaari yeeyo, Munna Neville? [Munna Neville oniira, "Amen. Ayo. Vekeekhai."—Mol.] Miyo, khino, kookuxa eyo ntoko yooreerelaxa vakhani, masi miyo—kaahiisoonaa saana vanaasiwa yeeyo.

Tivo, vano, nyuwo murina masipo n'itthu siiso, mulavule ni Munna Neville mwaarowaka wiipa, vano nto muhele, osulu iwe. Ni okhalana okathi woophiyaka ewoora nuusu sa mahooliho, nto ninrowa olukama Mitthaka iya soowiixerya saana ni noone ekhanlyahu woonaka Apwiya anrowaya wira. Ni kinwehererya paahi . . .

³⁸ Miyo—miyo kinnaamini wira nirina Ekeekhai. Ennikiphiyerya yeeyo. Kookupali wira etriku t'iryaya, vekeekhai, nikatamphe nniimwiivalaaniha ni yeeyo. Moosuwela. Ni, moone, khino miyo kinoopaka mpacerelo wa yeeyo, meelo ohiyu, moone, moota nikatamphe nniivalaanihaya etriku. Masi etriku ehaana okhala Ohoolo wa Mwaana, wira ettokotthe. Ni ti yeeyo ekhalenlyahu va, mpatthani, okhala Ohoolo wa Mwaana mpakha nikhuru nahu naamukhaani n'atthu va, mpakha okhala nootokothaxa wa Kristu, wira nikhale mukatthe vameesa Vawe. Ti yeeyo kinthunaaka wira niire.

³⁹ Nto vano nihinatthi waattamela Masu, nuumala ohimya ipoweema, ni siiso, nrowe nivekele-tho. Nuumala ninrowa okuxa yoosoma.

⁴⁰ Yesu Oophenteya, munikhaliherye ohiy'ula vano, mwa moolumo ala vakhani, okathi onoowehereryahuni Nyuwo. Ni ninvekela wira mahala Anyu ni ikharari sikhale ni hiyo, Pwiya. Ni moolowihe mirima sahu; mususihe makatamphe othene, miiwa, ikhuukwa, muhiye waarya woottotopeliwa wa nsuwa wa Muluku omorele Mmasuni, Pwiya. Ni wira nikhhalane muthukumano muulupale mpakha vahinrowaya okhala mutthu ohoopowa eriyari ahu, aana othene ekhale Momweneni mwa Muluku. Ale ahirina opatiiso wa Erooho, yaakhele Yeeyo, Tithi. Isiiri sothene suulupale sinthuneya hiyo osuwela okathi ula, Pwiya, nuupululeliwe hiyo; nto nnimoona wiiveviha wa Muluku, wira nisuwele moota wo wiiseetiha mmansihu ni wira, niilokihaka mmansihu ni naaruuhaka mamempuru a erutthu ahu mweettelo wooreera wa Masu, wira nisuwele moota w'okhala nihiku nla na vano wo waattamela wa Pwiya Yesu.

41 Kisomaka Masu Anyu ohiy'ula, Pwiya, siiso, ni osoma woohimalela, kiweryaka osoma moolumo mamosa-mamosa, ni khino ohiromola oratta-eene makina. Masi, Pwiya Muluku, Nyuwo paahi munwerya okumiha yoohimya vaavo. Ti Nyuwo paahi munwerya wira. Khiyaavo—khiyaavo enamuna ya mutthu ophiyerya wira yeeyo; eri mmatatani Mwanyu, Pwiya. Tivo munivahe, khula ohiyu, itthu iye siipithihiwe Mmasuni Mwanyu, wira nikhale aKristu ooloka ni nikhaleke voolikana ni okathi onkhalaahu, ntoko ithoonyeryo sa oKristu. Ninvekela mwa Nsina na Pwiya Yesu. Amen.

42 Vano, anci-ene a nyuwo, mwa aBibilia anyu, kintthuna mukhunle Eliivuru ya Yona. Eyo e...Kweekwe khaninreere olavula sa Yona okhala namatthikela ottuli ni sothene. Miyo kweekwe kimmukhaliherya Yona. Nkinaamini wira Yona aari namatthikela ottuli. Miyo—miyo nkinaamini iyo. Kinaamini paahi wira eyo...Hiyo imaara sikina ninrumeela yeeyo, ni niniira, "Owo ti Yona." Masi hiyo na...Miyo koolavula eyo, mwa enamuna ekina, kihimiyaka moota miyo kuupuwelaaka, Yona, etthu yiiraneieye.

Masu a APWIYA yaahimukhuruwela Yona mwaana a Amitayi, yiiraka,

Nvenye, murewe epooma yuulupale ya oNinive, ni mwakhuwelele yeeyo; okhala wira sowiira saya soonanara soophiya wa miyo.

Vano Yona aahivenya wira atthyawe ohoolo wa APWIYA, orowaka oTarsu, nto aahirowa oYoope; weiwo aahimphwanya paketi aarowa oTarsu: aahiliva musurukhu wa esisapo, nto akhuruwela mwemmo, wira arowe ni yaawo oTarsu aatthyawaka APWIYA.

43 Eyo kahi emalelo yooriipiha murima? *Mutthu Ontthyawa Ohoolo Wa Apwiya*, nto owo mwaha aka.

44 Vano, yoopacerya nintthuna nuupuwele ela. Yona aari... Mwaha ene, mwaha muulupalexa, kinaaminelaaka owo iirenle awe etthu ela yuulupale va, waari mwaha wo wira Yona aari muYuta. Ni aavekeliwe wira arowe epoome emosa y'Amalapo, wira akhuwelele yeeyo alopolaka; uupuwelaka wira khaarowa waakheliwa. Okhala wira, Amalapo yaamurowa wuupuwela, "muYuta ola orina-vo exeeni ni hiyo?" Masi, moone, etthu ekina, enninivaha etthu yuulupale va wira noone, wira Muluku kahiyo Muluku a muYuta paahi, masi ni Owo Muluku a Mmalapo. Owo Mulukuu a atthu othene.

45 Owo aathanlale aYuta paahi. aYuta yitthaniwa atthu oothanliwa a Muluku. Awo athanleliwe niwoko khata. Vano niwoko nlo naari, waavaha ikano, nave khiyaawenrye osuka. Ni Owo aahooniherya tu, ni atthu ale, wira ikano khisaaweryaneya osukiwa, ni wira Owo aari mu—mu—Muluku a exariya. Ni ikano saavekela exariya, masi khiyaakhanle mahala mwa ikano, wira

mutthu axintte. Khiyaavo ehukhumu yaalinwva ni ikano, masi yaathhuneiye mahala wira eliveriwe ehukhumu ile, ahiiso nipuro ikano sinihenlyaya-vo.

⁴⁶ Ni Yona va iitthaniwe, ntoko ola, mmosa wa maprofeta akhaani a mBibiliani, wira arowe epooma ela.

Ni va ninniphwanya ethoonyeryo ya hiyo othene. Khula mmosa a hiyo, hiyo kweekwe ninnitthyawa etthu, ninnitthyawa mukattyamiho, ninnitthyawa soothokorerya, hiyo—hiyo othene ninnuuramela wira yeeyo. Hiyo—hiyo na—hiyo ninnuuramelaxa otthyawa ohiya okhala wira noonanane. Moone, hiyo paahi, hiyo—hiyo—hiyo nimphwanyaneya nitthyawaka.

Imaara sikina ninniiphwanya wira ninnuuramela otthyawa muteko. Hiyo khanintthuna, khanintthuna ovara muteko. Aakhala atthu anuupuwela wira anoowerya ophwanya yolya ehivaraka muteko. Masi, kinoona wira, ti Salomoni ohimye wira naamuwerya ophwanya va yoowaakhula, naweha-ru eneneele.

⁴⁷ Moosuwela, eneneele yaamukhaani, enihimmwa wira eyo (yothene) eneneele yaahivare-ru muteko enammaathi, eneneele eyo khenlya eyiita eyo, nave. Tivo, atthu othene ahaana o—ovara muteko.

⁴⁸ Nihaana itthu sinci-ene nrinaahu wira, othokorerya wunci-ene orinaahu woonanana. Atthu othene ahaana woonanana muteko khata.

⁴⁹ Okathi nyuwo—okathi nyuwo mumphiyeryanyu o—omuthanla mwaar'inyu, wira muthele, wala omuthanla iy'anyu, nyuwo—nyuwo muhaana okhalana othokorerya. Ni nto muhaana wuupuwela . . . Khino nyuwo munteka empa; empa yooreera yooreerela. Ni nto, muupuwele, ntoko muthiyana ootheliwa, muhaana wuupuwela muteko wo waalela anamwane. Ni muhaana wuupuwela wira ixiri iye sooreera, sootherenya sinoorowa okhalana, malepa a matata oonyakhuwa mapuro othene. Vano muhaana muteko wo waalela an'inyu. Muhaana muteko wo waavaha ikuwo ni yoolya.

⁵⁰ Sothene othokorerya. Ni ti yookhweyaxa, okathi othokorerya onniphwanyaya, wiihuluxa yoowo. Nt ninnoona wira othelana muteko muulupale, mwa inamuna sothene.

⁵¹ Hata, imaara sinci-ene, ninniphwanya . . . Ti yoolipa ohimya ela, masi ekeekhaii, wira arumeyi, imaara sinci-ene, anniuhuluxa muteko mwaha wo okuxa opuro wa Masu a Muluku eekeekhai okathi anheliwaya ohoolo wa Yaawo. Awo animwiihuluxa muteko aya. Okathi Ekeekhai ya Masu a Muluku ninruuheliwahu ethoni ni ethoni hiyo atthu, hiyo nihaana . . . ninnuuramela wiihuluxa mpakha yoorowela yookiserya.

⁵² Kinoomala-ru olavula ni musulu aka mwaamukhaani iwe. Owo muKatolika, ni owo . . . Ni koompatisa mmirav'ole,

mwa Nsina na Yesu Kristu, nno miyaakha vakhani sivinre, nto owo aaropacerya weettana mwaaruusi mmosa ni khukhala muKatolika. Ni kaahivarela ntata n'ame awe okathi waakhwaaya iwe. Awo yaahikileela, moolumo ookiserya, "Mmukhapelele Melvin." Nto owo onnikhalanaka sooloha. Owo khonwerya. . . Khula, khula nihiku, esumana evinre, owo onnikhalanaka sooloha. Iirale, "Miyo kaanvolowa mukereja mwan'nyu, Haalu Bill, nto nyuwo mweemenle vale mulaleyaka. Miyo kaamwaakuva, wira kipacerye olapa. Kaanvenya." Owo khwira, "Miyo—miyo koovonya."

Miyo khwira, "Melvin, khivantthuneya hata otaphuleliwa yeeyo. Opuro anyu ti vathi vale vaniiraanyu mpantta." Ti yeeyo. Munnona?

⁵³ Masi woonanana soothokorerya, imaara sikina onninipera esapala ene, wira yeeyo. Ntoko tiithi, woonanana yoothokorerya, yo ommama mwan'inyu. Axikhaani awo, khamuntthuna wira yeeyo. Masi ntoko tiithi wala maama, muhaana okumana ni muteko wo omulela mwaan'owo, okhala wira Bibilia ohimnye wira, "Mwiinanele ekopo nto munoomuhonona mwan'inyu." Ni eyo nlelo ennitthunaneya vamaithoni va khula napisikoloxiia ori molumwenkuni. Eyo nlelo enkhala Ekeekhai ya Muluku. Vaakhanle wira yaaniiriwa eyo imaara sinci-ene, khanaarowa okhalana opahuwa w'amwaavano ni itthu siiso, ni wuntta orinaahu molumwenkuni olelo. Masi nlamulo na khalayi na eweero na vatthokoni noohononiwa, khalayi saana, ni annihiiwa anamwane wira sothene antthunaaya.

⁵⁴ Masi hata ntoko sihimalyaaka, arumeyi, anoophiya ethoni ni ethoni ni Ekeekhai, vano nto animwiihuluxa Yeeyo. Moone, awo—awo arina paahi. . . Enkhala ntoko wira yookhala etthu awo—awo ahintthunaaya woonanana.

⁵⁵ Imaara sinci-ene yaahikhala atthu jaarwiiye, khwira, "Miyo koosuwela wira eyo ekeekhai, Munna Branham, masi kaira-ru yeeyo, kaamoomoliwa mukereja." Eyo erina-ni? Mwaahiire-ru, munoorowa woomoliwa, osulu Iwe. Tivo muhaana woomoliwa, nipuro nlo, moone. Tivo vanreerela moonanane yeeyo, ohiya otthyawa ni wira, "Ahe, kinrowa nno. Nkinthika." Mutthike, tthiri, nwiriyane vakhani-tho a Yaawo.

Mwaavavye Soolempwa. Yesu ohimnye wira, "Mwaavaavye Soolempwa, okhala wira mwa Seiyo nyuwo munuupuwela okhalana Ekumi Ehinimala, ni ti Seiyo sinkikhalela Miyo onamoona." Masi hiyo ninnoona wira atthu khanoonana ni yeeyo.

⁵⁶ Oruhiwaka, Ohoolo wa Muluku, ni woona okathi Muluku omulampe awe natiri, ni Muluku ohaana onviriha natiri owo. Nto okathi Owo ommutaphulaawe natiri owo, vano atthu animoova woonanana othokorerya wo okumana ni Mutthaka w'okathi. Ninniphwanya eyo mapuro othene.

57 Ankhi nyuwo aLuteraano? aLuteraano akavi yoova, athu yaanoova woonanana Ekeekhai ya Lutero okathi orwiiyawe ni okhalihiwa naxariya? Nkawehani etthu yaatthuneieye wa nyuwo, khino ekumi anyu yeenyu, mwaha wo okhuma ni omuhimya Yesu Kristu ni—ni okhala lu—Luteraano.

58 Nkaiweheni nyuwo aMetotista, moota yaakhalakaya, nyuwo othene mwiiithaniwaka masantu oophirikeya. Kinoona wira mwaahisuwela eyo. Ni yaamukela Muroohoni, ni otannyeya nno ni iwe. Ni yiiriwaka awo—awo jaarina “etannyeyelo.” aMeto- . . . Eyo, nnari, eyo khiyaari aPentekosite; eyo yaari aMetotista, miyaakha sinci-ene khalayi. Ni awo yaanitannyeya, ni yaanithukumela, ni omorela vathi va owerya wa Muluku. Ni yaatatheliwa maasi wiitho waya, ni ovekhuleliwa nnivekhulelo, yooniwaka wira yaamuhileya. Nto, vano, nyuwo mwaatthokeleliwa okhala nikhuru n’a masantu oophirikeya. Masi nyuwo mwaarina, aximai anyu ni axitiithi, yaahaana okupali Yeeyo, woonanana Ekeekhai ni sookhumela, ahiiso yaamukhootiwa.

59 Ankhi nyuwo aPentekosite mwaakhenle wuuluuliwa wa soovaha, okathi opatiiso wa Erooho Yoowaarya oruule aya, ni olavula ilavulelo, ni soovaha sa Erooho sitthikelaka mukereja? Vano, aMetotista yaatthunne owoomolani, ni yaahiira. Masi nyuwo mwaahaana woonanana eyo. Eyo etthu yaatthuneieye nyuwo wira.

Ankhi mwaha, okathi oruule aya, mwaha wa opatiiso mwa Nsina na Yesu Kristu, ni nyuwo khoona wira yaari Ekeekhai? Muhaana woonanana eyo, wala wira etthu ya yeeyo.

Mookhalana othokorerya, athu othene aakhalana, ni muhaana woonanana itthu iya. Vaareera.

60 Ni okathi munoonanyu nto, nihiku nla vano, okathi Masu a Muluku yaalaihennyaya anatiri ala a itthu sinoonaahu siiranyaka vano, vano nihaana muteko wo woonanana Yaawo wala wiihuluxa Yaawo. Nyuwo muhaana. . . Nyuwo khimukhanle okhalaka siyo. Nyuwo muhaana wira etthu wa Yeeyo. Khwira. . . Mweettelo khata ohaana wiiriwa.

Nyuwo khimukhanle ovolowaka mukhor’ole wa ekereja ni okhuma mutthu mmosaru yoowo nvolonwe anyu. Nyuwo munkhala ottaiwenexa, wala vakhiviruxa ni Muluku, khula okathi nyuwo munvolowanyu wala munrowanyu vate vale.

61 Oh, moota eryaaya yookhweya athu wiihuluxa itthu iya! Ni kintthuna wira nuupuwele itthu iya napacerya-ru miteko s’okokhorela vootthokihiwa meelo ohiyu, wira, kintthuna wira nwehe okathi etthu eniheliwaaya ohoolo, vakhala wira nyuwo. . . yakhala yookoha wa yeeyo. Yakhala yookoha wa yeeyo, ohaana okhala waakhula.

62 Niire, ntoko nlikanyiho, miyo kiirale wira kaarowa onkela nsuwa, vano nyuwo mwaakithoonnyenrye epante *ila*. Ahe,

naanaanoru, miyo kaanvira etthunelo aka, ni kaamukhala. . . kaamukhala onkela epheyo. Ahe, ankhi mutthu aakithoonyenrye wira kirowe epantte *ila*, nto miyo kinarowa epantte ele? Kaanvira-tho etthunelo aka; kaaronwe-ru okuusini. Ahe, wakhala-ru ohoverya, epantte xeeni okhanle onkela nsuwa, ohaana okhala waakhula woolikana nipuro nlo.

Ni okathi soohoverya iya sinnikumananaya, sa Ikeekhai sa Bibilia, ohaana okhala waakhula w'ekeekhai nipuro nlo. Ti yeeyo. Ohaana okhala vo.

⁶³ Ni noonaka Etthu wooniheriwa, kinoona wira, ohiya otthyawa paahi, wira, "Ah, ethiru! Nkaakhanle waaminiki etthu ntoko Eyo. Nkaakhanle waaminiki Iyo," muhinimukuxerya-ni Bibilia, mukilaathi moonanana Yoowo? Mmusome Yoowo. Nyuwo muri vamuthukumanoni va naanaano, nwehe paahi Yeeyo. Nwehe saana Eyo, mmansinyu, ni Masu. Nwehe Masu, ni Masu. Eyo t'inamuna emosa paahi yo wiiriha Awo ohimya Ekeekhai. Ni Awo ahaana ohimya Ekeekhai, okhuma Maphattuwelo mpakha Wiisuupulula.

⁶⁴ Kristu ti wiisuupulula wa Bibilia othene. Mwa Yoowo, Kristu, omalela wothene. Omaliheriwa wa oprofeta wothene wa Bibilia ommaliheriwa voothitthuneya etthu mwa Kristu Yesu, okhala wira Owo aari Muluku owooniheriwa mw'erutthuni.

⁶⁵ Vano naaphwanyaka itthu iya, nnya, okathi onoonananahu ni okela vamuthukumanoni, ni wona Oweriya wa Muluku weetteettaka ni wira itthu, ni ovara miteko sa erimu, ni wona eyo wiiriwa, ni oweha mBibiliani ni wona wira yoolaiheriwa okathi ula; nto noonaka itthu iyo, nto ninoonana ni othokererya wo okupali, kintthuna ohimya wira, vanaasiwa yoohi.

⁶⁶ Vano, atthu anci-ene anniiraana, atthu anci-ene anihimya wira ti yoolikana. Masi eyo kheni—eyo khenkhaliha ele. . . Eyo kehiyo etthu mukhanlyanyu othokoreryaka. Ntoko sihimalyaka, ankhi. . .

⁶⁷ Miyo kaakhanle mmiravo, ni kimphavelaka mwaara, wira kithele; nto va aaphwanyaneya mwali aarowa omaliherya khula yoothuneya kuupuwelaaka wira t'entthuneya wira emukhalihe muthiyana. Vano, volakeya owo aari pwiyamwene, ni oophenteya, ni—ni omutthu wooloka, muKristu eekeekhai, sothene kaakhanlyaka wuupuwelaka, wira akhale wa miyo mwaara ooloka. Khivancala moota xeeni kaarowaaka ohimya wira t'oloka voomalela, eyo ekeekhaii volikana, owo khaarowa okhala awaka mpakha miyo kimukupali ni othokorerya wa owo okhala mwaar'aka.

⁶⁸ Eyo etthu emosaru Mutthaka okhanlyaya. Nyuwo pooti wira, "Owo ti woolikana, wala *ela*, *ele*, wala *ekina*." Ni wira, "Miyo kinniiraana ni Yoowo, kinnaamini wira Eyo Ekeekhaii." Masi nyuwo muhaana okupali Yoowo; ni Owo ohaana okhala epantte

ya nyuwo, ni nyuwo epantte ya Yoowo. Muhaana . . . Nto, Owo ti wawinyu.

⁶⁹ Nyuwo mwaamuthelaka muthiyana khata ola mmuthanlale anyu, nyuwo mu—nyuwo munkhala mmosaru nto.

Ni ti siiso nyuwo siryaanyu ni Kristu. Nyuwo mwaamoonaka Owo wooniheriwa ni okhala eekeekhai, nto nyuwo mwa epantte a Yoowo, ni Owo epantte a nyuwo. Ni, vamosa, nyuwo mwa epantte ya Mutthaka.

⁷⁰ Oh, apaketi akavi a muromolelo nrinaahu anrowa oTarsu, wa aYona a mahiku ala, imiya thanu na xexe a yaawo, etthu siiso, apaketi antthara ephiro yookhweya. Ahintthuna woonanana.

Yona khaatthuna woonanana, etthu yo orowa w'Amalapo. Owo khaatthuna oroiha Mutthak'ole wootakhala iwe, "Muhina mwa mahiku miloko mixexe, munoopwete ya mwaahirukunxe murima." Owo yaanimunanara wira yeeyo. Nto aahuupuwela, "Amalapo ale, ti yoolipa ohimya etthu anrowaaya okiiriha." Masi owo aahaana woonanana eyo. Munnona? Masi owo aamukunxe paketi ookhweya khurowa oTarsu, khurowa okarakasani wa paketi ni khurupa; aakunxe ephiro yookhweya.

⁷¹ Eyo ephiro yookhweya, eyo ephiro yoowaatteliwa n'atthu. Ti yookhweya okuxa ephiro atthu othene akhanlyaya wookwatakani ottuli ni wira nyuwo mwa mutthu oreera murima, "Ni ola ti *Lexe ni lexe ni Lexe*," nto olumwenku onimoowehani. Ti yookhweya orowa ephiro y'atthu othene.

Masi okathi—okathi orinaanyu wira etthu yoovirikana, okathi orinaanyu weemererya okupali wanyu wa ele ensuwelaanyu okhala Ekeekhai, ti vaavo vari nipuro noolipa, ti vaavo vanrwa orika, vaavo vo.

⁷² Oh, ntoko imaara sinci-ene niniipakaahu nsipo nle na khalayi:

Moota onkhweyaya weetta mphareya eryeene
yoomaaleleya,
Ororomela ikuru sa moonoo muulupale wa
Yehova.

Masi, oh, muhiye mawipi apacerye ohakhinyeya, muhiye—muhiye ettheke erume ni wiiriha mawipi ohakhinyeya, vano eniiriwa-ni?

⁷³ Ntoko etthu kileeliwaaka, emaara emosa, muhano mmosa aahimye awe. Ottuli wu mahiku a ekhavaloo ni exarete, ehimmwe wira ekhavaloo yaarootthyawa ni yeeyo, ekhumaka okereja. Khwira, "Mwiirale-ni?"

⁷⁴ Khwira, "Kaaroromenle Apwiya mpakha mikhoyi okwaseya." Ahe, owo p'ukathi wo waaroromela Apwiya, nuumala sothene . . . mikhoyi sakwaseya-ru. Nyuwo munroromela mikhoyi mpakha iyo okwaseya. Ayo.

⁷⁵ Ni siiso ninnoona wira nihaana iphiro sinci-ene sookhweya otthara, apaketi arowaka oTarsu, tthiri ti yookhweya, ohithokorerya. Enoothereneya paahi, sothene sinimooreerelani; atthu othene annisiveleliwa ni nyuwo. Ni, atthu othene, nyuwo mwa. . . Khaavo onoovaanyihani; nyuwo khamunvaanyihana ni mutthu. Vano, eyo eri ntoko nttapwatta no wuukutthana iparatho! Ti yeeyo. Ayo, voohilipa, otteettheya! Vano, khula mutthu, nkincala wira mwa aani, ni etthu muneemereryanyu. . . Vekeekhai, atthu anuupuwela vooloka animoottittimihaxani mwakhala-ru oolipa ni ekupalelo anyu wa ele eri yooreera. Ekeekhai. Voohicala. . .

⁷⁶ Mmukuxe muthiyana, owo pooti ohikhala oovara murima saana, ni onakhaleru exeeni; masi mmuhiye muthiyano'owo eemererye malamulo a othiyana, mmuhiye akhale ntoko muhano; ni mulopwana akhalana-ru omulopwana vakhani mwa yoowo, owo onoomukhaliherya. Vekeekhai. Hiyo ninnittitimiha etthu mu—mutthu orinaawe, onaamini awe okhala ekeekhai ni onrowa weemererya ele anuupuwelaya okhala yooreera.

⁷⁷ Moota ayaaya oohilakeya, ti siiso aKristu anci-ene ari-aya olelo, t'owoolowaseya saana ni sothene, mpakha anuupuwelaya wira yothene arinaaya wira wiitakanxa ekereja, orowa nipuro nlo, ohela nsina naya muliivuruni, wala wira etthu yaamukhaani, otupha nno ni iwe, okhuwela, wala—wala etthu siiso, ni wiitthana yeeyo oKristu.

oKristu ti makhalelo a khula nihiku, oolipa murima, mmukhalelaka Muluku mwa. . . olumwenku ula wa vano. Opatta wa Mooro woohihyererya ni ophenta wa Muluku, mmurimani, sinookhalihani oovihiwa ni wookhalihani iwe n'atthu, ni waakhalihaka oorukunxela murima wa Kristu. Othokererya.

⁷⁸ Masi ti yookhweya orowa ephiro olumwenku onrowaya. Ti yookhweya okhuruwela muro.

Murowe mwakhale mmuro, ni mwaatiya anyu. Mukuxe ikaafi sanyu mpacerye ovura nvirikanyaka evirelo ya muro; nyuwo khamunkhalana okathi munci-ene, ni ti yoolipa otthara. Masi muhiye ikaafi emaara emosa nto nwehe moota munviraanyu miri mwaakuvaka, mukhuruwelaka, masi nwehe onrowaanyu!

Itthu saalenleyaka vookhweya-vo, muupuwele, munrowa va—vakhwararani yuulupale vathi vale, ya muthinto khata. Munrowa vakhwararani, ni khivanrowa opisa wira mmorele vakhwararani vaavo. Mulenleyaka ni olumwenku paahi, vookhweya, enamuna onrowaaya, nyuwo khamuntthuna eyo. Nnari, mulopwana. Masi muhaana otti-. . . okupali othokorerya wanyu.

⁷⁹ Vano, munnaamini Yeeyo, ni nyuwo muhaana e-. . . Nyuwo munuupuwela wira Eyo Ekeekhaii.

⁸⁰ Ni othokorerya Muluku onivahalyawe nihiku nla, wo oruuha Mutthak'ola! Ni okathi onuuluvalaaka, ni koosuwela wira mahiku aka anoovukuwa, kinnoona muteko okhala muulupalexa ovikana khula okathi. Niilipihaka, nihaana wira yeeyo! Nihaana wiivaha wa yeeyo, mapuro othene onrowaahu, ni ohimya Mutthaka; ni—ni waaleela atthu wira Yesu Kristu onnoorwa, wira Owo Mulukuu ni Owo onimoorwa voohipisa. Khuwaavo n—khuwaavo nrromelo ohanle mulaponi woohikhala Orwa w'Apwiya.

⁸¹ Kiwehaka ottuli wu axipatthani amosa-amosa yaari ni miyo iwe okathi Nlaikha n'Apwiya . . . Aximiravo ala amphwanyaneya va, kookupali wira aaphwanya nipuro yaakhumelenle aya iwe. Ni muupuwele etthu Apwiya yaahimuhimenrye aya nihiku nle, Munna Wood. Aawela vamwaako. Ni—ni aari ntoko wira aamunla, okhala wira amwaar'awe yaanwereiwa. Nto Apwiya khwira, "Muttotte nluku nle murihelele osulu, mwiire, 'SIISO ANIHIMYA T'APWIYA.'" Nto miyo khwira yeeyo. Ni Munna Wood omphwanyaneya ntoko namoona.

⁸² Nto miyo khwira, "Munna Wood, khunrowa opisa mpakha onrowaanyu woona etthu wiiraneya." Nto mmeeloni mwaya, okathi waaphwanyaneyahu iwe, othene ahu vamosa . . . Nto nikhuru na axilopwana awo amphwanyaneya vaava olelo ohiyu.

⁸³ Mulaleyi mmosa mmiravo aari weiwo, ni owo aari e . . . Miyo kiweha . . . Miyo kaammalaru omusuwela ohiyu waavinre. Owo aari omaxaaxani wahu. Owo aarwiye weiwe okhala ni hiyo. Nto owo khukiirela, owo khwira, "Munna Branham, nyuwo munnoonaka soowoona, mwakhala ota siisa?"

⁸⁴ Miyo khwira, "Ayo, mulopwana. Masi miyo kinrwa nno wira kiihuluxe yeeyo, wira kimumule vakhani." Owo khwira . . . "Ahe," miyo khwira, "Miyo—miyo . . . Tthiri, Awo annikooniha itthu nno." Nto miyo khwira, "Epantte ekina ya mwaako nno, waari weiwo Malaikha mathanu na maili yaakhumelenle aya *iwe*."

Owo khwira, "Ayo, kinnoona." Khwira, "Miyo kaari mmosa wa alipa-ookhaliherya muthukumano anyu oCalifornia."

Miyo khwira, "Ahe, vekeekhai kinnitteeliwa murima osuwela yeeyo."

⁸⁵ Nto niryeeene vaavale, okathi ene yoowo miyo kaahiwehaweha kimoona meetiku mmosa a mwiitti awehaka mmaithoni mwawe, ni kimwiiwa wira, "Nnoorowa woopweteyani niitho nlo, okhala wira wookhala oneeniwa mwa nenlo. Ni kinniloolaka mwa miyaakha miili, nto nnoorowa woopweteyani niitho nlo."

Miyo khwira, "Ethu mukikohenryanyu yeeyo, okhala wira meetiku anyu orimooleelani nihiku nlo wira ninoorowa woopweteyani niitho nlo."

Nto owo khwira, “Ti yeeyo,” vano owo khuweha *siiso*.

⁸⁶ Ni kiwoona ame awe orula emosa wa ipiyuuka saya ni wooniha nnawu naya, ni miyuuwe sikhaani silenleyaka eriyari ya ikatha saya, iwe ni nno vamwettoni vaya, ni khwira, “Mwamoonaru Munna Branham, mmuleele wira avekelele yeela.”

Miyo khwira, “Ntata n’ame anyu . . . aroohela nnawu naya so, khuhimya wira yaarina . . . arina miyuuwe mikhaani mwawaya—mukathani mwaya mothene, ni siiso, ni yiirale ‘Munvekele Munna Branham avekele.’”

Owo khwira, “Munna Branham, eyo ekeekhahi.”

⁸⁷ Miyo kiweha ottuli. vawehale aka, kimoona owo eemenlene vale akiwehaka, *siisaale*, ni maitho awe yaaryaka paahi. Kookumana ni yoowo ephovo ela; owo aarina maitho ooloka onvikana khula mutthu omamaxaxani. Apwiya yaahinvoniha khimukhalihahi mukumi.

⁸⁸ Kiryeene weiwe, Apwiya khwira, khukooniha etthu yaarowa wiiraneya. “Ehukhumu ehanle ophiya Olimani Onkela nsuwa.” Ni Awo yiirale, “Murowe iwe, waattamela vaikho vale.”

⁸⁹ Nto kaahikhalana efoxolo mmatatani; kirowa weiwe. Nto Munna Roy Roberson, othene ahu ninnimusuwela va. Owo khokhanle vaava ohiy’ula, vansuwelaaka; owo ori wArizona wu. Owo ti mukhulupale a maatiministratore va, ni kaanisuwela wira aari veteraano. Ni etthu yaarowa wiiraneya; voosiisu wooreera saana, woomaaleleya, ewoora yanamuloko voosiisu. Aximiravo othene vaavale, muloko wala muloko n’aili a hiyo, nikurumulaka iheema, ni nikumihaka isapala sa ophako, ni itthu. Nto hiyo . . . miyo khweetta vale, khwira, “Roy, mwiiipithe, mwaakuve. Yookhala ehanle okhumelela.” Nkaawerya-tho omuleela etthu. Masi okathi ene yoowo kironwe aka iwe . . .

Ni ekhuruwaka wirimu yaarwiye eyuupuru ya Muluku, khuruma vancipale, ntoko, khuttikinya matumuxa, eviraka muhina mwa mwaako ole, khuthikila nipararuwa vaavo vene, voophiyaka emeeturu emosa ni isentiimeturu miloko mithanu vasulu va muru aka, khuthikilasa irintta sothene sa vasulu va miri iye, okathi maluku yaarihiwaya. Khuwela osulu khukhuruwa-tho, ni opatiiso mukina muulupale, khumana mwaako epantte ni epantte, ni khurihela maluku siisaale. Yiirale eyo imaara tthaaru, vano nto khuwela osulu.

Nto Munna Banks khukirweela, khwira, “Ti yeeyo nyuwo mwaahimnye anyu nsana?”

Miyo khwira, “Ayo, mulopwana, eyo ekeekhahi voolikana.” Munnona?

⁹⁰ Vano nto mahiku maili nuumala yeeyo, Alaska aahalela, opwina, osulu iwe. Ni nno ni iwe Olimani iwe Onkela nsuwa sinkhalaka itari ni isukhumelo, ni sothene siiraneyaka. Nto

nihiku nlo owo onothereneyela vathi v'ephareya. Ekeekhai. Exeeni iyo? Hiyo ninkhala okathi w'Orwa w'Apwiya.

⁹¹ Ninnnoona ismu ni itthu sikhumelelaka, ni itthu iya sothene soohiyana-hiyana, noosuwela wira ohaana okhala waakhula w'ekeekhai wa yeeyo.

Aakhala atthu okuluttuni nno naanaano, anrowa mmittuphani ni itthu, "Ni mahiku yeetaka 16 a Marsu," moosoma eyo mpapheloni mwa ihapari, "Apwiya animoorwa." Moosuwela wira kahi siiso.

Yesu iirale, "Khaavo onsuwela minuutu wala ewoora."

⁹² Okathi ononaahu itthu iya sothene, ni itthu siiraneyaka moota siniiraya, ni ohaana okhala waakhula w'ekeekhai nipuro nlo. Ehaana okhala Ekeekhai. Wookhala omosa, onkhuma nsuwa; ni omosa, onkela nsuwa; masi wookhala omosa, okuusini, ni onkela epheyo, wala etthu siiso. Masi ohaana okhala waakhula w'ekeekhai, nipuro nlo, wa mulattu owo. [Nipuro vahiitthu mufiitani—Mol.]

⁹³ Wiihuluxa yeela? Nihaana waaleela atthu wira ninkhala iwoora sa Orwa wa Mwaana a Muluku. Hiyo ninthuna—ninthuna niwehe ni (Muluku) okhala oovara muteko, okathi wothene, oolikana wira ninvahe mutthu waakhula woolikana.

⁹⁴ Kweekwe enkhalaka siiso. En—enkhalaka mwa mutthu, onimwiihuluxaka ni wiihuluxa wa Muluku, okhuma Atamu, omatta w'Edeni. Okathi Atamu aaryawe omatta w'Edeni, vaphiyalyawe okathi wo othokorerya wira athanle, sintoko aamukhala ni Muluku wala aamurowa ni amwaar'awe? owo aahaana opaka wa-. . . owo aahaana opaka eyo, o—othokorerya waamutthuna yoowo. Owo aahaana okuxa ele amwaar'awe yaahimye aya wala ele Muluku ohimye awe. Nto okathi owo othanlale awe orowa ephiro ya amwaar'awe, ni vairale awe siiso, nto owo waahimpweteya mukhalelo awe woopacerya. Ni aahiruuha olumwenku wothene vathi va okhwa, okathi owo aarinaawe okuxa othokorerya, wala okupali waarya wa naanaano amwaar'awe yaaphwannye aya, yoowo waari woovirikana.

O Muluku! Muupuwele yeeyo. Muluku aavanhe Moolumo oophiyaka mathanu na mararu wala muloko paahi wira esukeke. "Masi mwiri ule muhilye." Ti yeeyo tu awo yaarinaaya osukaka. Ni hata ni Masu ene yaawo, awo yaahihonona.

Vano Atamu aahaana woonanana, "Kiireke—kiireke ntoko amwaar'aka ahimye aya wira kiire, wala kiireke ele Muluku ohimye awe wira kiire?" Ni owo aakhumme ni maitho awe oothukuwa. Owo aahaana okuxa othokorerya. Eyo yaahirihela nloko nothene n'atthu mookhwaani.

⁹⁵ Vano khurwa Atamu ole mukina, yoowo aari Kristu, nnakhala mmosa aatonko okhala ntoko Yoowo! Mutthu oniira

Owo khaari Muluku? Omosa Awe waahooniherya wira Owo aari Muluku. Khonatoko okhala oopattuxiwa otonko okhala ntoko Yoowo. Owo aakhala molumwenkuni ni Yoowo mwaneene. Owo aayariwe ota wa mukhalelo wa mutthu a erutthu, natampi. Aleluya! Owo aari Mpattuxa Mwaneene oowiipaka erutthu.

T'ani aarowa owerya ophiya nipuro Owo ophiyalayawe? T'ani otonko ophiyerya olavula ntoko Yoowo? T'ani aarowa owerya ohimya itthu Owo aahimiyawe? T'ani aarowa owerya wira itthu Owo iiralyawe? Omosa Awe waahooniherya wira Owo aari Muluku. Khaakhanle profeta wala mutthu mukina aawerya wira etthu Owo iiralyawe; Yoowo aawerya owiitthana alipa-ookhwa wira ekhume mmahiye, ni Yoowo aawerya weemexa osulu, ni wira khula etthu Owo aatthunawe wira. Owo aari Muluku. T'ani aawerya okhala voopuroni Vawe? T'ani? Exeeni Owo aakhanlyawe okhalaka woohikhala Muluku ule, ooloka voomalela oohikhwa, iipanke erutthu khukhala ni hiyo!

⁹⁶ Khiyaavo yaalikanyiheya ni Yoowo. Owo aakhala molumwenkuni ni Yoowo mwaneene. Khaavo otonko olavula ntoko Yoowo. Okathi Owo aatthukulawe eyano Awe, yaahikhala etthu ya omeekha, yaari yoovirikana ni mutthu mukina. Ookhala ohimye wira Owo aari mutthu pure paahi; miyo kinnivirikanya eyo. Owo aari Muluku. Ti yeeyo Owo aaryawe. Maana, khaavo otonko olavula ntoko Yoowo, khaavo aawerya olavula ntoko Yoowo, okhala wira Owo aari Masu Mwaneene makumi yaaipanke erutthu, wiisooniherya wa omalela wa Muluku.

⁹⁷ Kinookupali, wira maprofeta ale yaahikhalana mutthaka aya. Awo yaahikhalana okathi ole; awo aakhalanasa vano. Masi waahikhala oMuluku wothene woomalela mw'erutthuni, wwooniheriwa vo. Owo aari Mmosa yoowo, ni Owo aari Ole aarina woonanaka ni mwaha. Ni owerya Wawe wothene wuulupale Owo aarinaawe, wira Owo mara aamuwerya wira okhanle mwene a molumwenkuni. Owo onoorowa okhala; ni Owo, w'atthu Awe ooreera murima, Owo ti yoowo naanaano va.

⁹⁸ Owo aaphwanyaneya vale. Mutthu xeeni aarowa okhala oohaawa, ahaarina nipuro n'owuuramiha muru Awe; aasuwela hata wira ehopa yaahimirya musurukhu wa maluku? Yoowo, mutthu xeeni aawerya okuxa mino iye suulupale sa maasi ni otatuxa okhala eviinyu, nave ohikhalana nipuro n'owuuramiha muru Awe? Owo aahaana woonanana ni othokorerya aavahiwe awe mmatatani mw'Awe. Mutthu xeeni aawerya omuhihimuxa mutthu mmahiye, vaamanly'awe okhwa mahiku maxexe ni anttaka?

Owo khaakhanle wiisopolaka Mmansawe? Vekeekhai, Owo aaniwerya; masi Owo iirale-ru, Owo khaarowa wira onooponle. Owo aahaana woonanana othokorerya, ni mwaha wo wiiwelela Wawe Masu! Yeeyo, ohiiwelela wa Atamu, ni owo

aakunxe ephiro yookhweya, e—ephiro ya oTarsu. Masi Yesu aakunxe ephiro yo orowa oNinive, w'Amalapo, wira amphwanye Mwaakameliwa. Kootteeliwa murima ohiy'ula, Owo wira siiso. Nihaana woonanana sookhumelela, wira niniira mpantte wa Yoowo, okumiha olumwenku. Amen!

⁹⁹ Khula mutthu aahaana woonanana yeeyo, aarina othokorerya ohoolo wa Muluku. Nimmukuxa, ntoko nlikanyiho, Nowe. Owo aahikhalana. Nowe, Moise, Eliya, ni othene akina a— a khula okathi, yaahaana woonanana othokorerya. Ni yaahaana wira, masi waari mwaha wa yeeyo yaaveleelihiwaaya okathi owo.

¹⁰⁰ Nkanweheni Nowe mwa okathi awe wa siyensiya, moota owo aarinaawe wira oonananne etthu yaari yoohikhala ya siyensiya. Vano, khinaakhanle ni—ni—niwoko yahaakhanle aya ohikhalaka ya siyensiya. . . Moone, yaari—yaari yoohikhala ya siyensiya, kiireke. Vano, yaahimmwa wira yaamuruwa orupa epula okhuma wirimu. Awo khayaatonko okhalana epula okhuma wirimu. Vano, owo aahaana woonanana yeeyo. Muluku aahimye wira yaamuruwa orupa epula. Vano nto owo. . .

¹⁰¹ Vano waamini woohikhalana miteko ti woohkwa, mwaahimyaka wira, “Miyo kinnaamini,” nave khuhinaira etthu. Siiso ntoko Mutthaka, mwaahimyaka wira, “Miyo kinnaamini,” khuhinaira etthu, eniphwanyihani yoorera? Munnona? Nowe aahirowa ovara muteko ni enyutto awe khuteka ekalawa, wira alipiherye etthu owo aahimyawe. Ti yeeyo erinaahu wira, nave. Nihaana orowa ovara muteko, wira nooniherye waamini wahu, ni miteko sahu. Miteko sahu sinnooniherya waamini wahu.

¹⁰² Moise aahaana wira, ni Eliya aahaana wira. Khula profeta okathi awe aahaana ovenya ni woonanana othokorerya nno. Masi anci-ene aya khayiirale ntoko Yona. Owo aarootthyawa; awo nnari.

¹⁰³ Nwehe, “Mukhuwelele yoowo.” Oh, wulu! Eyo vo. Owo ti mwaha, “Mukhuwelele yoowo.” Vo ti epantte yo owehexaxa.

Murowe iwe paahi mwaaleele atthu ale, “Eyi, miyo kirweenle wiitakaiha ni nyuwo mw'atthu. Moosuwela, kookupali wira kinimooleelani enrowaaka wira. Kookhalana etthu emosa yaamukhaani va kinaamini aka wira kinoowerya opaka e. . . onitakanxa hiyo othene, ni wira *ela, ele, wala ekina.*”

Masi, waari, “Mukhuwelele yoowo,” okathi orinaanyu okhuwelaka etthu. Vano, owo aahaana okhuwelela avirikanyihaka sothene saari iwe; okhuwelela alopolaka epooma, okhuwelela alopolaka muteko aya, okhuwelela alopolaka ekereja aya, okhuwelela aalopolaka maprofeta aya, okhuwelela aalopolaka arumeyi aya, okhuwelela aalopolaka anamukuttho aya. “Mukhuwelele yeeyo, etthu yothene! Mukhuwelele yeeyo!”

104 Nowe aahikhuwela apwapwelaka okathi awe. Vekeekhai, owo aahiira, apwapwelaka ikereja s'okathi awe.

Moise vekeekhaixa aahikhuwelela o—okathi awe; atthu, anamukuttho, ni sikina. Owo aahikhuwelela mpakha mothakoni. Khula mukumano, owo aahikhuwelela, voohihyererya aakhuwelelaka atthu.

Eliya aari oohitthunaxiwa n'atthu nihiku nawe, okhala wira owo aahikhuwela avirikanyaka okathi ule. Vekeekhai t'aryawe.

105 Yohani Mpatisa aari oohitthunaxiwa n'atthu okathi awe. Owo aahikhuwela avirikanyihaka okathi awe. Owo aahimuleela mwene, mu—mukhulupale a mu—a mulaponi; owo—owo aarina, owo aamuthenle mwaara a munn'awe. Owo aahaana olaleerya mwaha wa othelana ni omwalana, voosiisu umosa. Tivo owo aahikhuwelela avirikanyaka yeeyo, owo iirale, “Ti yoovirikanya malamulo nyuwo omuthela.” Waatthunaneieye, muru awe ohiitiwa, ohoolo waya, masi owo aahikhuwelela ni aahikhala voopuroni wawe va muteko.

Owo khaamukunxe paketi orowa oTarsu, ni wira, “Ahe, kinimwiiwanana ni nyuwo, Heroti. Ti yooreera. Muupuwelakaru wira owo muthiyana ooreerela, owo akhalaru mwaara ooreerela, mukeleleke ohoolo.” Oh, ikharari, mattapwatta ale ookukuttha-no iparatho! Moone, ayo, tthiri etthu yaamukhaani, hmm! Vano, kehiyo hat'etthu woohikhala okukuttha-no iparatho.

106 Masi, nwehe, Yohani khaari siiso. Owo aarimoonanana yeeyo. Owo iirale, “Ti yoovirikanya malamulo nyuwo omuthela.” Ayo, mulopwana. Vano owo aahikhala avirikanyaka yeeyo.

107 Awo khiyaatthyawanse. Yohani nnari. Awo yaarimwiilipiherya khoonanana sookhumela. Moise aahehererya otthyawa, emaara emosa, ntoko Yona, masi Muluku khimuttikiha. Anci-ene aya yaahiphavela wiihuluxa; awo yaampacerya . . .

Masi, nwehe, vakhala wira Muluku oowiitthanani, ni nyuwo mookupali wira Muluku ori Mmutthakani, khiyaavo etthu enrowa woottikihani. Eyo khiyaamuttikinhe Yona. Nnari, mulopwana.

108 Amosi a khalayi, aahikhuwelela, khwira, “Mwatto iipaka, taani ohinoova? Ni Muluku oolavula, taani oni ohilaleerye?” T'ani oni ohilaleerye, ooniwaka Muluku olavula ni wira etthu khata enimwiraneya, nto eyo vo?

109 Mwatto iipaka, atthu othene animoova, ayo, mulopwana, mwaatonko ene omwiiwa mmosa akhulumaka mutakhwani. Vanooweryaneya owiwa ala nno asonyaka mukayelani nno, amwaatto awo oolemeihiwa, masi nyuwo muhaana omwiiwa mmosa eekeekhai, mutakhwani okhuluma emaara emosa. Maluku makhaani anoomora vamwaako, imeeturu imiya xexe

ni miloko mithanu ni thanu na piili voorakama. Kintthuna koone moota okhoronowa iwe onkhumaya mmasasuni mmwe. Ni owo onoorihela muru awe vathi, onooroiha mairi ale osulu; nkinatoko wiiwa etthu. . . Ntoko e—ekanyawu erumaka, okathi owo onkumihaawe okhuluma iwe wuulupale mmasasuni mwawe. Taani ahaakhanle woovaka?

Eniiriwa wira, mwatto amwiiva-ru mutthu, khonoona owereya. Owo oniwiivani mwaha wo wootutuxani ohinatthi woophiyeryani. Moone, nyuwo khamunsuwela. Owo onimootutuxani ni okhuluma iwe wuulupale woowali, nto muhina mwa esekuntu emosa ori mwa nyuwo.

¹¹⁰ Owo iirale, “Mwatto iipaka, taani ohinoova? Ni Muluku aalavulaka, taani ani ehilaleye?” Nyuwo mwaamoonaka Muluku wira etthu, nyuwo muniira. . . “Miyo pooti ohikhala profeta. . .” Yona iirale. . . “Miyo pooti ohikhala profeta, wala mwaana a profeta. Masi Muluku oolavula, taani ani ehilaleye?”

¹¹¹ Miyo pooti ohikhala profeta, miyo pooti ohikhala *ela, ele*, wala *ekina*. Miyo kaamoonaka Muluku wira etthu p’itthu, ni kinoona va mwa Masu, ni Owo oolaiherya, taani okhanle omaalaka ni okhala oomaala? Vekeekhai, Owo ohiira.

¹¹² Nnakhala khanikhanle wiipithaka wiithela wa iyaaminelo ni ipatthanelo iya sothene, ni orowa—orowa oTarsu. Hiyo khanintthuna orowa ni ipatthanelo iyo.

¹¹³ Masi anci-ene, ntoko Atamu, aniira etthu emosaru, aneererya opaka erantteliho mwa enamuna emosa, aneererya ophwanya ephiro y’okhuma, ni—ni opaka erantteliho, wira yoonanane Muluku. Vaamanlyawe osuwela wira aahivonya, khoonanana Ekeekhai, aahirowa ni amwaar’awe khwiira yeele Muluku aamuhimenrye awe wira ahiire. Owo aahikelela ohoolo khwira, khula enamuna. Vano nto owo khwiiphwanya aryeene epwitipwiti, muthiyana ni mulopwana, oowaili, omatta wEdeni. Maitho aya yaahitthukuwa. Awo yaanisuwela yaari yooreera ni yootakhala, nto. Vano nto owo khuphavela ophwanya erantteliho, wira aikhuneele vakhani ni yeeyo.

Vano, eri ntoko siiso hiyo siniiraahu olelo, ntthyawelo, niniira, “Ahe, kinimooleelani, vaakhanle wira waari *va*,” wala, “vaakhanle wira *ela*,” wala, “*vaakhanle, vaakhanle, vaakhanle*”! Eyo paahi. . . Munnona? Masi muhaana woonanana eyo. Eyo ti yoolikana ahiiso yoovonyeya. Ni yakhala yoolikana, nrowe nikhale ni yeeyo. Yakhala yoovonyeya, mwiihuluxe. Ti yeeyo tu. Mukuxe e. . . Musuwele eri yooreera. Khamunrowa otthuna olipelela-tho. Nrowe nisuwele vano ele ekhanle Ekeekhai ni ekhanle yooreera, ni nikhale ni yeeyo. Noosuwela wira eyo ekeekhai.

¹¹⁴ Vano, hiyo ninnoona olelo wira atthu ahu t’o. . . Enikhala ntoko exariya yothene yookhuma mukereja. Miyo. . . Mwa e. . .

¹¹⁵ Hiyo ninkhala empa emosa iwe ya munna mmosa muthiyana oophenteya onrwa ekereja yeela. Owo alakela omphwanyaneya vaava ohiy'ula. Ni owo onaarentteriha awawe...atthu. Ni owo onnikhalaka oonireerela murima saana vanaasiwa empa ele, wa onitthuniherya hiyo okhala empa ele. Nto siiso miyo kaamuromola nsina nawe, masi khino owo khonththuna wira kiire. Ni owo khonreereke onireerela murima, ahe, hiyo tthiri khinaarowa otthuna—khinaarowa otthuna ohmuhimya ti pani owo. Masi owo onkhalaka muthiyana mmosa, oophenteya saana. Ni mpaani, yaahikhala etelevisawu onloothoni. Nihaana ekhaani, mampa, maili oopharaanihiwa.

Kirina etthoko emosa yuulupale, ni nikhuru n'anamwane, ni hiyo...ni nyuwo—nyuwo moosuwela, ni awo ahaana okhalana moolili, ni sinci-ene. Ni sothene soothukumanyiwa vasulu, ni muhaana weetta varyari va *ela* ni *ele*, wira nvolowe ni wira mukhume.

¹¹⁶ Vano nto iwe awo yaahikhala etelevisawu. Ni mutelevisawuni mu, anamwane ala yaahiphiyerya woona, Ttiminku voosiisu, muthinto mmosa wo wiipa masipo waavira. Ni, moosuwela, eyo—eyo yaanilahela omuulihaha muru mutthu; wahaakhanle oKristu wooloka nipuro nlo waakhanle waapapeliwaka, wira moone ele eniitthaniwa oKristu. Vano, enkhala ntoko exariya yothene yookhuma-mo. Vano, awo khani, enkhala ntoko wira awo...Vano, ti yoowooipiha moota awo ankhalaaya vale ni wuupa matata ni owana mmosa ni mukhwaawe, vale, ni ophavela wiipa masipo ni sothene siiso; ni ohimya iperwa hata nahota ahaarowawe ohimya, ni ohimya inamuna sothene sa itthu, ni anoohweela ni otthikela. Moosuwela, owaarya wa—wa—wa oKristu onkhala ntoko woopweteiwa opuro aya.

¹¹⁷ Vano, miyo kinoorowa okereja ni—ni omoona pastore owela vale ni ohimya wira onoo—onoorowa okhala o—oxiraana wo orapelela. Athiyana othene ni ikuwo iya s'orapa-no, othene anoorowa weiwo. Anrowa okhalana oxiraana; athiyana ala, erapelelaka. Ni wira anrowa okhalana ni—niira na muthinto khata, ni anrowa owaarika anci-ene—alyakhu anci-ene, ni omuttikha cuuku, ni itthu iya sothene siiso. Wa miyo, onnikumiha oxariya wooloka m'oKristuni; ni ohiirihwa etthu ni khula etthu.

¹¹⁸ Miyo kihoona, kirwaaka nno, nimphwanya...Moosuwela, ninnaaphwanya axinn'ihu athiyana anci-ene yaawaraka akaputtula, nno elapo ela yooriirya, ovikana simphwanyaneyaya iwe elapo ele yooviha. Moone, eyo ekeekhaii. Iwe okhanle woovihaxa, khakhanle anci-ene anaawara yaawo. Masi nno, okhanle—okhanle wooriirya, awo—awo annaawara. Moone, eyo ti, awo khansuwela wira owo ti xetwani oniira yeeyo. Munnona? Vano, vaakhanle wira ekhale ookhurunuwa murima, vaakhanle wira okhaliherye, yaamukhala yoovirikana.

Mukhale mulopwana, kinoona wira ti yoonanaraxa mwa mulopwana, masi—masi nyuwo—nyuwo—nyuwo khimwaarowa omuxikha mulopwana. Masi, muhano, yawawe—erutthu awe ti yooreerihiwa, ni ohaana okhalihisa siiso. Ni owoona aalweene. . .

¹¹⁹ Vanooweryaneya owoona, atthu olelo. Siri irooho piili. Nto emosa aya ti Erooho Yoowaarya; ekina ekhanle erooho yootakhala, nto mmosa onihoooleliwa ni yeeyo. Ni oowaili aya anatiini. Vano, ayo, eyo ti epantte yootikiniha, oowaili aya anatiini. Ni siiso ntoko Esawu ni Yakope yaarisaya, oowaili anatiini; ntoko Kayini ni Apele yaarisaya, oowaili anatiini; ntoko Yuta ni Yesu yaarisaya, oowaili etiini, oowaili anatiini. Ni ninnoona olelo, ipantte soopiili, sa etiini. Moone, erooho emosaru. Atthu annookhwa, masi erooho khenkhwa. Eyo enookelela ohoolo, oowaili anatiini.

Mmosa aya t’ovariwa ni Erooho Yoowaarya, orina enamuna ya makhalelo orinaawe okhalaka, ni oneetta vooreera murima ni vaxariya. Awo khiyaarowa okumiha esentavo emosa yawinyu, ni awo—awo aniira sothene sinweryaya vaxariyavo, wira yookkhaliheryeni. Nto akina ano. . . Vooreerelaxa ntoko sinweryaya okhala.

Ni akina, ninnoona wira, ti voovirikana. Ni, nnakhala vo, soopiili irooho sa etiini, piili saya; emosa, Erooho Yoowaarya; nto ekina, erooho yootakhala. Ni nyuwo mwawehe vale, eyo, hata ekhinyaka okhalana etiini, animoonyemulani ni owiitthanani santu oophirikeya. Awo aniira etthu p’itthu akhanlyaya wiiraka.

¹²⁰ Awo, ahicalaka ma—Masu a Muluku ahinrukunuwa, ntoko wira Awo khanalempweke.

Moone, nyuwo pooti wira, “Vano, nkawehani va, vakhala—vakhala wira opatiiso. . .”

“Miyu kihaana Erooho Yoowaarya!”

“Ni mweemenle vo ni sikaro owo mmatatani, munvuraka?”

“Ayo, kihaana Erooho Yoowaarya! Nkinoona wira ti yoovonyeya owurya vakhani. Nkinoona wira. . .” Munnona?

Ni nyuwo moowehe, “*Miyu* nkinoona”? Masi Muluku onuupuwela voovirikana, moone, voolikana ni Masu Awe. Munnona? Moone, awo. . . Ni awo—awo paahi aniira ntoko—ntoko osenyela wa Yaawo. Eyo ekeekhaii voolikana.

¹²¹ Voolikana paahi ni oorakala ole mwaamukhaani aaipurunle emaara ele, okathi David oomoliwaawe veehicensi vawe. Owo aarowa owela Vamwaako Olivera, akhumaka, anlaka okathi waawelaawe, awehaka ottuli. Nto mulopwana ola mwaamukhaani khwiipurula vale ni aamusenyela yoowo. Nto kwarta ole khwira, “Kinoohiya e. . . muru ole wa mwalapwa okhala mwa yoowo, ni omusenyela mwene aka?”

Davidi khwira, “Mmuhiye.” Moone, aahisenyeliwa.

¹²² Miyaakha soophiyaka imiya thanu na tthaaru ohoolo waya, awo yaamusenyenle Mwan'awe, Yesu Kristu, nave.

Ni olelo awo animusenyela-tho Owo. Ntoko wira Eyo khiyaari paahi. . . Oohittittimiha, oohicaliwa, anoovenxa muru paahi ni wiihuluxa Yaawo, ni otheya wiitho wanyu. Mwaha wa xeeni yeeyo? Awo ari mpaketini onrowa oTarsu. Eyo ti yoolikana.

Ela enninkekela Muluku, ehaana okhuweleliwa epwapweliwaka yootakhala, okhuwela epwapweliwaka etampi, okhuwela sipwapweliwaka itthu siri soovonyeya. Vano, muupuwele, enoorowa okhala.

Hey, moosuwela, okathi ola. Moosuwela, kiri ni iwoora piili voovirikana. Ni oTucson iwoora thanu na piili ni minuutu muloko, ni—ni kinhala vakhani—vakhani okhuma voopuroni vaka nno. Huh? Vaareera.

¹²³ Vano muupuwele, nihaana orowa waakhula mwaha wa yeeyo. Muupuwele, ale animusenyela Kristu annaakhula mwaha wa yeeyo.

Okathi Davidi waatthinke-awe waakhumenle awe, okathi owo aaryawe mulipa-ootthyawa, nto okathi otthinke awe, muupuwele, mutth'ula aahimora khwiipopheya ohoolo wawe khuvekela omoreliwa ikharari. Owo aahimusenyela Davidi, arowaka, masi owo aahalela orapiha inawu sawe ni maithori, nto, okathi otthinke awe.

Ni nihiku nlo ale amuthoronle Yesu anamoona.

N'ale ammuthorola Yoowo olelo anamoona eyo, nave. Awo, nihiku nlo, eyo enoottika. Muupuwele, Wiisuupulula 22, Owo onnivekela wira nisukeke khula Masu Owo olempe-awe; Masu othene.

¹²⁴ Vano noosuwela wira Mukhalelo Awe ori vaava. Ti woolipiheriwa. Ninookhalana yoowo. Ninniroromela, esuman'ela enoorwa, wira onoottikhela okhala woolipiheriwa eriyari ahu; aretta anoovonihiwa, ni wira itthu suulupale sinoorowa wiiraneya.

Hiyo khaninthuna muupuwelo w'anamunci-ene. Hiyo nintthuna Ekeekhai. Ni khani, hiyo (nintthuna) khaninthuna o—khaninthuna woonanana hat'ethu woohikhala ele Muluku ohimmyawe okhala Ekeekhai. Masi, "Mukupali wira itampi sanyu okathi wothene sinimoophwanyani." Saahoophwanyeni nno, sinimoophwanyani Woolamuliwani. Tivo nyuwo mwa—nyuwo mwa. . . Sinoorowa woovarani nipuro nlo, vano. Ayo, mulopwana.

¹²⁵ Masi mwakhala muKristu eekeekhai, vekeekhai oowitthaniwa ntoko Yona saari-awe, Muluku ookhalana epasaxi anyu yoolinwa. Mukhume mpaketini mmo onrowa oTarsu, khula enamuna. Muluku ootthomenleni ekumi ila. Ayo, mulopwana. Nyuwo mwakhala mwaana eekeekhai,

oowitthaniwa a Muluku, murwe wa Kristu. Murwe mwa omalela Wawe. Orowa wanyu oliveriwe vayi? Woolinvwa orowa oNinive, kahi oTarsu. Nyuwo murootthommwa. Paketi anyu . . . Ookhala paketi onkhuma naanaano va, ori mphironi. Tivo eri etthu emosa paahi yo wira, owela mwemmo. Ni nyuwo mwakhala ntoko Muluku, khamunrowa okhalana murettele. . .

¹²⁶ Ntoko musulu aka mwaamukhaani, okathi vakhani ovinre. Miyaakha soophiyaka muloko vano, owo onoorowa okhuma nipuro orowa nikina. Voosiisu uwo owo onoorowa ekerej'ela, ekereja Katolika ela nno, ni onookuxa ela mwaha wa etthu phaatiri oowaarya onlavulaawe va, ni mukina *va*, ni mmosa *va*. Erina efayita xeeni yothene eyo? Munnona? Vano owo nlelo onvoliwa etala ni ntthona. Miyo kiirale, "Opuro anyu ti waltaari iwe, mwan'aka." Munnona?

Khiivo enamuna yo otthyawa eyo. Muluku aphiyerya-ru woottharani, vanreerela muhiye nto mukelele ohoolo. Ti yeeyo tu.

¹²⁷ Muupuwele, Muluku! Ahe, Muluku aari mmwaatiyani. Muluku aari mutthekuni. Muluku aari muhina mwa ehopa. Mapuro othene owo aarukunuwelawe, Muluku aari vaavo.

Moone, Muluku aari vaavo, ni eyo enoottthikela yootthimakelakani. Vano xeeni hiyo olipelelaka-tho? Nrowe nipacerye muhakalaliho ola oratta-ene. Ti yeeyo! Munlipelela exeeni? Hiyo ninnaamini wira Orwa w'Apwiya ori vakhiviru, ni Awo anoorowa okhalana Mwaakameliwa, ni Owo oolikana. Ni hiyo khinnaatthuna hata apaketi oorowa oTarsu. Ninrowa oNinive. Huh! Ninrowa Movuwani. Amen. Ti yeeyo. Ninrowa nipuro Muluku onrowaawe oreeriha, ni ti yeeyo entthunaahu wira.

¹²⁸ Okhala Ohoolo wa Muluku, nto, ni mirima sahu; kahi matata ahu, vanci-enexa, masi mirima sahu ohoolo wa Muluku, mpakha Owo omala onilikanyiha, voomalela, siiso, ni mirayi sa ovuwa Wawe, ni waapeya Yawawe—oreera Wawe murima mwa hiyo, ottokotthiha ele erinaahu, ekhalaka ekeekhai, moone, vamphieryahu owerya owooniha akina wira Yesu Kristu mukumii. Oh, wulu! Ninthuna naamini yeeyo.

¹²⁹ Ni muupuwele, waaronwe awe Yona, Muluku aari mmwatiyani; Muluku aari mutthekuni; Muluku aari muhina mwa ehopa. Owo aahitthikela akhalaka ni Yona mpakha otthuna Wawe wooloka wiriwa. Ti yeeyo.

Ni aphiyerya-ru woottharani, khino nyuwo munoohapuwela *nno*, ni ohapuwela *iwe*, masi munookhala ootakhaliwa mpakha mutthike ni mwiire ele mpacenrye anyu omwiirela Yoowo voopacerya. Munnona? Muhirowe, muhitthyawe Ohoolo wa Muluku. Moonanane yeeyo. Nyuwo munnaamini wira Ekeekhai, vano muhiye. . . Yaari Ekeekhai, vannireerela okhalela yeeyo, okhwela, khula etthu ekina. Nto vakhala wira Owo oolipherya

yeeyo wa nyuwo, wira Ekeekhaii, vano khanikhanle otthyawaka eyo, hata nipuro n'orowa. Owo onookhala vaavale, vamosaru siiso. Khimukhanle otthyawaka.

¹³⁰ Ni profeta Awe oovaheriwa, ole Owo omurumme awe orowa iwe ni olaleerya mutthak'ole, vano, yaakhala ntoko Owo aamwiira omurumme-ene profeta mukina, masi Owo aamutthokinhe Yona, ni hata Eliya khaarowa wira, Yeremiya khaarowa wira, Moise khaarowa wira, aari Yona aarina orowa oNinive. Yaari yeeyo tu. Owo aaroomuruma khimuleela wira orowe. Ni okathi Owo ohimnye awe wira, "Murowe iwe, Yona, murowe oNinive," khaavo mutthu mukina aakhanle orowaka ni wira eyo woohikhala Yona.

Ni Muluku ooleelani-ru etthu, muhaana wira; khaavo-tho mukina. Moone, hiyo nihaana woonanana eyo tu, ni, ni orowa wira.

¹³¹ Ninnaamini wira ninkhala ewoora Muluku oniiraawe etthu. Ninnaamini wira ninkhala eriyari ya seiyo vano. Kinnaamini olelo ohiyu wira kinlaleerya muthukumano yoowo wo—woowaataleleya, olipelelaka vo wira ottokotthe paahi. Miyo—miyo vekeekhai kinnaamini iyo, ni murima aka wothene. Miyo kaamuhimya wira ti siiso vano ntoko kweekwe enkhalakaaya.

¹³² Vano, hiyo ninnaamini wira okathi woophiya Yohani Oowaarya 14:12 orinaawe omaliheriwa. Hiyo, ninnaamini wira Malakhiya 4 ohaana omaliheriwa. Hiyo ninnaamini wira Luka 17:30 ohaana omaliheriwa. Hiyo ninnaamini wira, soolaleeriwa s'eprofeta iya sothene Owo ohimnye awe wira saamwiiraneya nihiku nla. Ninnaamini wira sihaana omaliheriwa, ni ninnaamini wira ninnoona iyo omaliheriwa naanaano va. Eyo ekeekhai voolikana.

¹³³ Muhiye otthyawa. Muhikhume Ohoolo Wawe; nwele paahi murowaka Ohoolo Wawe. Eyo ekeekhaii. Ni koosuwela wira ti yeeyo nyuwo entthunaanyu wira. Okhala wira, kaahoon mapawe ota wu oTexas, ni Louisiana, ni mapuro othene. Ti yeeyo ekhalenyahu va, kahi wira nitthyaweke okhuma Ohoolo Wawe, masi wira nitthyaweke Ohoolo Wawe.

Mutthike, mukhume...[Nipuro vahiitthu mufiitani—Mol.]...okhala Yona, vakhala wira munniphavelaka osuwela epantte xeeni y'orowa wala etthu yo wira, murwe, munwele paketi ni hiyo ohiy'ula. Hiyo ninrowa oTarsu, nakhuwelele... ahiiso, oNinive, nakhuwelele. Nimmuhiya paketi ole onrowa oTarsu okelela ohoolo awo yatthuna vale. Nihaana muteko ohoolo wa Muluku, okhanle, Mutthaka hiyo okhanle ahu oothokoreryaka yoowo.

¹³⁴ Tivo esumana yeela enrwa, mpacerelo mwaamukhaani paahi ohiy'ula, wira musuwele. Kaakhuwelelaka, miyo kinthokorerya Mutthaka mmosa paahi, axinna. Nyuwo

arumeyi mukilaanthe va, miyo nkiri va wira koosikuliheni. Ni nyuwo athiyana n'alopwana, mwa mwaha ola wa othelana ni omwalana onaattamela, kintthuna wira muupuwele ohiy'ula. Kinnihimyaka sothene iya, wira kooruuheleni yeela nyuwo, wira miyo kinaakhula paahi wa Muluku.

Nto vo, emaara ekina, miyo kintthokorerya mwaha wa nyuwo, wooleelani Ekeekhai. Ni nkinrowa wooleelani etthu woohikhala Ekeekhai, vakhalaru wira Muluku onnikisuweliha ele ekhanle Ekeekhai. Mpakha kisuwele Ekeekhai, nkinrowa ohimya etthu ya yeeyo, moone, nkinrowa ohimya etthu ya yeeyo. Masi kinnaamini wira Muluku onnikooniha Ekeekhai ya *Othelana Ni Omwalana*, ni kinrromela wira Owo onookitthuniherya wooniherya yeeyo.

¹³⁵ Ni Mitthaka mikina miyo kimpavelaaka okhalana esumana ela, ti, *Melikisetekhi Ola Ti Pani? Muluku Othanlale Vayi Wira Ahele-Vo Nsina Nawe?* Ni itthu kamosa-kamosa iyo siiso, seiyo sikhanelle Mitthaka sinrwa, ni *Owereya W'oyara*. Ni—ni itthu kamosa-kamosa, mwa—mwa ettharelo yeeyo, ni soomaleliha wa *Mulopwana Amuthanlaka Mwaara Awe*. Ni itthu kamosa-kamosa, Mitthaka iyo, kintthunaaka oruua esumana yeela. Masi kintthuna paahi wira muthukumano. . .

¹³⁶ Vaavo, aakhanle-ene murumeyi va; miyo nkikhanle va, axinn'aka. . . Nkinthuna wira nyuwo, wala amosa-amosa wa nyuwo mamempuru, mwathikela okereja wanyu, munaira, "Munna Branham ohimnye *sa ni sa*."

Kihaana muteka wa Mutthaka kivahiwaaka wa Muluku Oowerya sothene. Ntoko kimpwanyanyaaka va ohiy'ula, ni Muluku onnisuwela wira ekeekhai, wira omuro wenna nno. . . Aakhala atthu, khino, akilaanthe va, okathi Nlaikha nle n'Apwiya naakhurunwe aya iwe khukileela etthu Nlo naakileenle aya, weiwe 1933, wenna nno Ephiro Spring. Nyuwo mwakhala muletto va, murowe weiwo. Nlootho na Ephiro Spring, weiwo nyuwo mumphiyanyu omuro, nto ti weiwo yiraneieye aya. Eyo yaari 1933. Alakela soovira miyaakha soophiyaka miloko miraru ni miili, nto. Oh, soovira miloko miraru- . . . soovira miloko miraru- . . . miyaakha miloko miraru ni miili sivinre, miyaakha miloko miraru ni miili sivinre.

Ni moota Nlo naaruuhale aya yeeyo voolikana, sothene. Nto nikhuma, niruuhaka Mutthaka, ni ninniwoonaka aretta ovonihiwa, oohoona, ni oowereeya, ni oorakala, ni ootuthunya, ni sothene. Ni nto wona wira hata alipa-ookhwa, ninsuwelaahu wira aawehawehiwa, aahihimuwa mw'alipa-ookhwa. Atthu arimookhwa, ni khutthikela-tho okhala akumi, ni itthu iya sothene. Mutthaka wakhuma vale, sookhala ithoonyeryo ni mitikiniho!

¹³⁷ Ni nyuwo nlelo munoona enamuna yeele yo wuupuwela muxuttihiwanyu? Eyo khenkhuma wa Muluku. Muluku khorina

wiiraka tu . . .

Muluku ompavela woovarani murima wa Etthu.

¹³⁸ Vano nto okathi Yesu okhummwe awe, Owo aahipacerya waavonihare aretta, ni ovara miteko suulupale ni itthu. Owo, kweekwe, Owo . . . Yesu aahiira eyo. Ni Moise ni Yesu yaahiirasa, n'akina aya. Ni okathi Owo aaryawe muumu, Owo aahiira.

Ni Owo onniira eyo, etthu emosaru ololo. Okathi Owo onveelelihawe muthukumano ntoko owo, mihakalaliho, ni opacerya muthukumano mulaponi, ni opacerya weetteetta ni ithoonyeryo iya suulupale ni mitikiniho. Vano nto khunoona, munatthika, enamuna yeele ya khalayi yo wiixuttiha, yookhala—yookhala etthu ehilonke vo nipuro nlo. Yookhala etthu ya naanaano enkhumelela! Okathi Yesu iisoonihenrye awe, numala, okathi . . .

¹³⁹ “Owo Rabbi ooreera murima.” Owo aaniwerya orowa khula epulpitu n'ulaleya, okathi Owo aavonihawe aretta. Okathi, oh, waanaasivela okhalana Yoowo iwe.

Masi nihiku nimosa okathi Owo aakilaanthi awe, khwira, “Miyo n'Atithi Aka nri Mmosaru,” munna, Owo khaatthuniwaxa numala yeeyo. Okathi Owo iiralyawe, “Mwaahikhuure-ru erutthu Aka, n'uwurya Ephome Aka, khamurina Ekumi mwa nyuwo. Masi ole onkhuura erutthu Aka, ni onwurya Ephome Aka, ookhalana Ekumi ehinimala; ni Miyo kinoomuhihimuxa nihiku nookiserya.” Vano, Owo khaari ootthuniwaxa n'atthu okhuma okathi yoowo.

¹⁴⁰ Awo yiirale, “Mulopwan'ola namawurya ephome. Mulopwan'ola Pelizepuli. Eyo t'inamuna Owo iiralyawe itthu iye. Owo aaniwerya ohimya ehako. Owo aanithokosa sawaya—miyuupuwelo saya ni aanisuwela miyuupuwelo saya. Owo nahakoo.”

Masi, yaari exeeni iyo, Owo—Owo aari Masu a Muluku owooniheriwa wa okathi ule. Ni Owo aahikhalana muteko. Owo khwira, “Miyo okathi wothene kiniira ele enaasivela Atithi Aka.” Muluku anikhaliherye wira etthu emosaru, wira ele enaasivela Atithi.

¹⁴¹ Ni kinwehererya wira nyuwo othene munimwiiwa saana. Nyuwo mwaahikeemererye mwa Mitthaka iya ni itthu, muupuwele, mukhalane nttittimiho ola mano, wira kihaana othokorerya, ni nkinrowa oTarsu. Kinrowa oNinive, ni ki—kihaana okhuwelela. Apwiya yooreeriheni nyuwo othene.

Nrowe nuurame muru ahu vano okathi vakhani paahi.

¹⁴² Enihalela ophiya ewoora ya neethanu na xexe ni minuutu miloko miraru. Nkinthuna woopisihani, masi kintthuna kiphwanye ela kawerya vale, ohiy'ula. Ookhala mutthu va o—ohikhanle voolikana nipuro vaatthuneya owo okhala mwa Kristu, masi nyuwo—nyuwo mwaanithuna okhala,

ni munnitthuna okhala, mwaanitthuna ovenxa ntata, wira, “Munna Branham, mukivekelele”? Muluku ooreeriheni, nkawehani paahi matata. “Miyo—miyo kintthuna... Miyo kiri va, Munna Branham, wira kimwaattamelaxe Muluku.”

Ni vakhala wira muru anyu ohiinuwa, ni—ntata naka noovenxiwa, nave. Ti yeeyo ekhalenlyaka va. Koovoliwa etala, ntoko nyuwo.

¹⁴³ Masi, oh, nihiku nlo, emosa wa itthu suulupalexa saahikhumelela, ni miyo—miyo koosuwela vano etthu yo wira. Ni ki—kinvekela wira Muluku oovaheni maiwelo ale oosuwanyeya. Ori vaavo. E...Wakhala ohoverya mmuruni mwanyu, ohaana okhala waakhula nipuro nlo, wira waakhule ohoverya iwo. Mavekelo aka, t’ala, Muluku ootthuniherenyi woona ohoverya iwo waakhuliwa okathi ene yoola.

¹⁴⁴ Mwaawereiwaka, Muluku oovoniheni. Ninoorowa okhalana miteko s’ovoniha, woona waka, voowiraka khula ohiyu, ni ninrowa waavekelela aretta. Ninoorowa wira sothene sinweryaahu wira nookhaliheryeni, ni mwiire sothene sinweryaanyu wira munikhaliherye. Ni ninrowa ovara muteko vamosa, niroromelaka wira Muluku onoonivaha muthukumano muulupale.

¹⁴⁵ Vano, Muluku Tithi, moolumo ala vakhani oothikilaseya, masi awo ari mmatatani mw’Anyu vano. Pwiya, awo aahimmwa. Kihaana okumanana yeeyo. Siiso ntoko...Moolumo awo khakhanle okhwaaka; awo anrukureya elapo, imaara imaara sene nto nihiku nlo kihaana woonana-tho yeeyo. Kinnisuwela ela, Pwiya, ni kinihimya ni exariya voowiixerya.

¹⁴⁶ Miyo kininkelelela, Muluku ootthuneya, ohiy’ula, khula mmosa wa an’Inyu, ala. Ni, O Muluku, kinniroromela wira, esumana ehinatthi omala, awo a—awo anoosuwela saana, wira ohoverya, okhanle wuulupale saana mmuruni mwaya ohiy’ula, olakiheriwe. Munivahe, Pwiya.

¹⁴⁷ Aakhala amosa-amosa va ahinoosuwelani Nyuwo, Tithi, ntoko Moopoli, nlelo, wala khino ahinatoko osareya Erooho Yoowaarya. Ola okhale t’uhiyu ene.

¹⁴⁸ Pwiya, nkinwerya omusariha hata mutthu ni Erooho Yoowaarya; nakhala nkinwerya omoopola mutthu. Kinwerya paahi waahimeerya ele Nyuwo muhimmye anyu, “Ooreeriwa t’ale anvoliwa etala ni ntthona mwaha w’exariya, okhala wira anoovona.” Ni kinvekela, Muluku, wira Nyuwo mukhalihe etala eyo mmurimani mwaya.

Anci-ene, Pwiya, ahaana wira avoliwe-ene etala; yaarowa weettiha sayi ikilomo iya imiya sene, ni exeelo n’itthu sothene, ni mmiyaakoni sa epula, ni mothakoni, wira erwe nipuro naamukhaani na khalayi nimphwanyaneya vanloothoni va! Nto kinnuupuwela-tho, Nyuwo moohimya, “Vari Murutthu, t’anthukumanaya axawawe.” Munilyihe, Pwiya, ni Emana Anyu

ya oMuluku. Nvahe minepa sahu yeele tthiri sintthunaya. Hiyo ninvoliwa ntthona na Nyuwo, Tithi. Hiyo niri mmatatani mw'Anyu vano.

¹⁴⁹ Muhiye Erooho Yoowaarya yuulupale yaakhurunwe vamwaako nihiku nle iwe, kinvekela wira Eyo eponowele khula murima mpaani mu ni oreera Waya murima ni omoriwa ikharari, ni maiwelo. Hiyo ninnisuwela, Tithi, ti yeeyo entthunaahu, osuwela saana. Maana naahisuweleke eniiraahu, nto ninrowa osuwela sayi moota wo wira? Masi nihaana osuwela saana. Ntoko Daniyeli saahimye awe, owo aahikhalana “osuwela saana mwaha wa Yoolepa ya profeta Yereimiya.” Nto, Tithi, hiyo nookhalana osuwela saana mwaha wa Yoolempwa ya Erooho Yoowaarya, okathi Eyo ennuupululelaya hiyo ewoora ela. Munivahe, Pwiya, sootthuna hiyo nrinaahu wa Nyuwo. Voomaaleleya hiyo ninvekela yeela, Tithi, wa ovuwa Wanyu, mwa Nsina na Yesu Kristu.

¹⁵⁰ Vano ni miru sahu sowuurama. Munn'ihu amurumihaka akoorte owo, “Owo onookivaha mahala ni ovuwa, ni onoorowa ni miyo mpakha woomalelani.” Kintthuna wira nvekele voomaaleleya vano ni mwaavekele Atithi a Wirimu wira Awo yoovaheni, ohiy'ula, etthu entthunaanyu.

¹⁵¹ Munna mulopwana oophentiwa, munna mthiyana oophentiwa, Owo ori vakhiviruxa ntoko moonno anyu siryaaya vakhiviru ni nyuwo. Nyuwo, nyuwo mookaamini miyo mwa—mwa itthu sikina, mukaamini mwa yeela. Owo ori vaava wira oovaheni etthu p'itthu entthunanyu.

¹⁵² Oh, moovirani wa isumana sookiserya kinnikhalaka oovoliwaxa etala, oovoliwaxa ntthona, wookinkhelaxa, owoonani. Mwaha wa yeeyo kiirale aka, “Billy, nrowe owaani.”

Meda khwira, “Muntthunela-ni otthikela-tho iwe, elapo ele yooriirya, Bill? Nyuwo kweekwe munoowereiwaka vammilo ni sothene. Kweekwe muntthikaka, ni kamasi, ni munoolala vammilo, ni vanoorkelaayani olavula.”

¹⁵³ Miyo khwira, “Ahe, nkisuwenle.” Miyo khuwiirela... Kinnimoona mpatthani aka, Charlie Cox, okilaanthe ottuli iwe. Miyo khwira, “Kinnihaawela paahi omwiiwa Charlie wira, ‘Ekhopa ele ekhaani ewenle mwiri ole vale.’ Kinoovoliwa etala vanci-ene wira kiiwe yeeyo.” Miyo—miyo kintthuna o—okhala vakhiviru ni nyuwo.

¹⁵⁴ Koosuwela wira Munn'aka Banks khaareere owereiwa. Ni kaahoona yoowoona ya yoowo, nno woohikhala khalayi, nto owo aammaathale mathalama. Ni koosuwela wira owo aahalela onihiya, naanaanoxa. Kaawoonaka oohiyana-hiyana a nyuwo... .

¹⁵⁵ Miyo kaahirwa ohiyu uwo, omuthukumanoni w'Alipa a Nakoso aKristu, ni wa mulaponi mothene. Mutokweene “Tiithi” a Shakarian, tiithi awe Demos, owo aakilaathiki vale ni

aakhalaka awehaka mpakha miyo ovolowa, nto owo aamutheya, ni enamuna ele yo ovaha ntata aattikinyaka. Owo khaakhanle vale. Owo ohookhwa.

Vano miyo kaahaana orowa emusi ele, ni SIISO ANIHIMYA T'APWIYA, mwan'aya onoorowa okhwa, nave. Florence, miyo kaahimoonna mwa yoowoona, kaahimoonna owo okhwa. Ni koosuwela wira onoorowa. Nto miyo khwira, "Nvekele, nvekele paahi. Moosuwela wira yookhala... Profeta mmosa em meta aahileeliwa wira arowe amuleele mwene wira alokiherye empa awe. Nto owo khuvekela, ni Owo khwiinanela ekumi awe, miyaakha muloko ni mithanu." Miyo kiirale, "Nvekele."

¹⁵⁶ Masi, nwehe, nto miyo—miyo khutthika... Kaakilaanthe nno murestantante, nihiku nlo, kilyaaka. Mulopwana mmosa khukaattamela, khwira, "Nyuwo khamuhiyo Billy Branham?"

Miyo khwira "Ayo."

¹⁵⁷ Owo khino khaakisuwenle, mwaha wa *ela* va nipuro nla na ntari vamuru vaka. Miyo kaawanre eperuuka ela, wira kihilale vammilo wiiraneyaka muthukuman'ola.

Owo khukaattamela, owo khwira, "Koonna wira kaanoosuwelani, Billy."

Miyo khwira, "Ayo." Miyo khwira, "Nyuwo mw'ani?"

Khwira, "Ka John Warman."

Miyo khwira, "Ehaali awe Zip?"

Owo khwira, "Billy, owo ohookhwa." Ah!

¹⁵⁸ Miyo kaavira empa ya malamulo; kaarowa oliva mipoosito saka. Kiviraka empa ya malamulo, nto muhano mmosa khukilavuliha, nto owo khwira, "Mwaahisuwela wira John ohookhwa?" Wala, nsina khata. Khino siiso ohikhanle John; Ed, wala ethhu siiso. Nto miyo khwira... Miyo nkaamusuwela muthiyan'owo. Kaahoonna ehaaya. Nto khuphiyerya osuwela, wira nkaamusuwela.

Owo khwira, "Munnuupuwela ohiyu omosa wooriipela okathi muro waasanrye aya oviraka mukerekhere nno, ni mampa arowaka, Ephiro Chestnut, nto nyuwo mwiiwaha ekumi anyu wira nvolowe empa emosa wira mmukumihe muthiyana mmosa ni anamwane?"

Miyo khwira, "Nyuwo mwa yoowo?"

¹⁵⁹ Owo khwira, "Miyo—miyo ka muhano yoowo." Owo khupacerya okhuwela amutthunaka mwan'awe; munnimusuwela wahala aka. Owo khwira, "Ole kaamwiithanaaka 'mwan'aka,' oothela ni ookhalana ethhoko." Munnona? Nto owo ori va, oowuuluvala ni oottweelela; ni miyo kiri va, nave.

¹⁶⁰ Mmosa-mmosa, ninookumihiwa mustanteni, p'uhimya wene. Ni ninnikhalana mithukumano, onnikinkhela *ola*,

onnikinkhela *ole*. Hiyo othene nihaana ophiyerya ohaleela, nimosa wa mahiku awo.

Masi, munna mulopwana, muthiyana, nookhala Nipuro n’othukumana. Nrowe nikupali vano wira niri oratta-ene. Munookupali? Muhiiye omusuwela wahu wothene Muluku, ni sikina, okhala mahale-ene. Nrowe naamini.

¹⁶¹ Tithi, awo ari mmatatani mw’Anyu. Miyo kiri mmatatani mw’Anyu, Pwiya. Hiyo nri va paahi mwa wiivahererya vano, ohinatthi muthukumano onrwa ompacerya meelo ohiyu. Nyuwo munoonikhaliherya, Pwiya? Wira wawihu—ovaanela wahu okhaleke mwaha wa Nyuwo voohiiyererya! Mirima sahu ni miyuupuwelo sikhale mwa Nyuwo, ni Nyuwo moohimya wira mwaamunisuka ni murettele wooloka. Yoolepwa-tho mBibiliani, “Muhilipaneke osuwela wanyu.” O Muluku, hiyo khaninthuna osuwela wahu yoohi; nintthuna osuwela Wanyu. Munivahe, O Muluku. Ni wira muhakalaliho okele muhina mwa minepa sahu mpakha nikhuru nla na atthu nikhale murima mmosa paahi ni mwiiwanano mmosa. Munivahe, Tithi. Munivahe itthu iya, nivekelaka mwa Nsina na Yesu Kristu.

Mpakha munepa aka okuxiwa khuphwanya
Omumula omuratthini.

Vamwiikimanyo, vamwiikimanyo,
Okhale ovuwa waka . . .

Nrowe nivenxe matata.

. . . voohimala;

Mpakha munepa aka okuxiwa khuphwanya
Omumula omuratthini.

Yesu, mukikhalihe vamwiikimanyo,
Veephattuveloni yooreeraxa,
Mahala o . . . (Ayo, Pwiya, mahala.) . . . muro
woovoniha,

Onikhwalala veephattuveloni y’oKalvario.

Vamwiikimanyo, vamwiikimanyo,
Okhale ovuwa waka;
Mpakha munepa aka okuxiwa khuphwanya
Omumula omuratthini.

¹⁶² [Munna Branham oniipa vathi-vathi *Vakhiviru Va Mwiikimanyo*—Mol.] O Muluku! Aakhanleene khula a nyuwo onona ntoko wira aathuna orwa akokhore waltaari, mwaathunaka orwa, wira, “Nkikhanle vatthu vantthuneya wira kikhale, Pwiya. Miyo—miyo kintthuna wiivahererya-tho. Miyo kintthuna kiire yeeyo olelo ohiyu, Pwiya.” Mukhale ootaphuwa wira murwe. Ninrowa okhala vaava wira nivekele ni nyuwo.

Vamwiikimanyo, vamwiikimanyo,
Oh, okhale ovuwa waka;

Mpakha munepa aka okuxiwa khuphwanya
Omumula omuratthini.

Yesu, mukikhalihe vakhiviru va mwiikimanyo,
Veephattuweloni yooreeraxa,
Ya mahala wa othene, muro onivoniha,
Onikhwalala veephattuweloni y'oKalvario.

Vamwiikimanyo, vamwiikimanyo,
Okhale ovuwa waka;
Mpakha munep'aka okuxiwa khuphwanya
Omumula omuratthini.

¹⁶³ Nrowe nivekele, khula mutthu mwa enamuna awe vano. Paahi—muliyaale okathi paahi. Nrowe nuurame muru Ohoolo Wawe. Mwaamuthiyan'ola va, avekelaka, "Miyo kinnoophentani Nyuwo, Yesu!" Munnuupuwela okathi moonponwe anyu, iyaakha sinci-ene khalayi, munnuupuwela moota yaaryaya yoosivela wa nyuwo? Owo t'osivela saana siiso ohiy'ula. Nrowe nivekele, athu othene enamuna anyu vano. Nrowe paahi—nrowe othene niivahererye wa Muluku, niivahererye w'Apwiya.

¹⁶⁴ Pwiya Yesu Oophentiwa... [Nipuro vahiitthu mufiitani—Mol.]

Muro wo okhurunuwa waka murima wothene,
Ovikana ekumi wa miyo,
T'ani miyo orinaaka vathi va woohikhala
Nyuwo?
Wala pani Wirimu woohiyani Nyuwo?

Muluku Ootthuneya, hiyo ninvekela vano wira omoriwa Wanyu ikharari ni mahala siveleeliheriwe khula mmosa a hiyo, Pwiya. Hiyo nri va waltaari. Anci-ene khawenrye orwa; Munookumana ni yaawo mmakhaterani mwaya. Etthu p'itthu envahaahu, Pwiya, Nyuwo munnitthuna waakhela. Hiyo noovahani-ru Nyuwo okathi ahu paahi, Nyuwo munimwaakhela; oratta, Nyuwo munimwaakhela. Masi, Pwiya Muluku, ohiy'ula hiyo ninrowa voovikana yeeyo, ninvaha sothene sikhanyahu. Sothene sikhanyaka, sothene kinwehereryaaka okhala, sothene siri mwa Nyuwo, Pwiya. Hiyo ninvekela wira Nyuwo mukupali yeela, mavekelo ahu, mmurimani Mwanyu, Pwiya, ni munivahe wiixerya wuulupule wa Erooho Yoowaarya, wira makhalelo ahu erukunxiwe. Maana, ninnoona wira niri vakhiviru va woomalelani vano. Khokhanle opisaka-tho vanci-ene. Ni niwoonaka oophentiwa ahu akhwaaka, nihiku ti nihiku, amiravo n'atokweene, noosuwela wira vahilekenle ohaana omana mukhora ahu. Nto ohiy'ula, Pwiya, niryeeene ni muupuwelo ahu wooloka, nikilaanthe va, wala nikokhonre va, neemenle va, onakhale-ru mukhalelo xeeni oryahu, munaakhele, Pwiya Muluku.

¹⁶⁵ Mukikuxe, Pwiya. Nkihiyo etthu, masi etthu p'itthu kikhanlyaka, Pwiya, Nyuwo mwawerya okirumeela paahi, kinniivahererya wa Nyuwo.

¹⁶⁶ Kinninkelela, Muluku ootthuneya, khula mmosa wa ala. Atthu ala oophenteya okathi waaphwanyanyaaka wu mmyaakoni wArizona ni kinawunlela, nto va awo aakokhora waltaari ni hiyo ohiy'ula, nivekelaka, nivahereryaka makhalelo ahu. Hiyo ninnoophentani Nyuwo, Tithi, ovikana ekumi ahu yoohi. Hiyo ninnoophentani Nyuwo waavikana amusi ahu. Hiyo ninnoophentani Nyuwo onvikana mwaara, aana, tiithi, maama, muna mulopwana, muthiyana, iya, mwaara. Hiyo ninnoophentani Nyuwo, Pwiya Yesu. Mukhalihe eyo y'ekeekhaixa mmurimani mwahu, Pwiya. Muyeherye makhura a ohakalala, esumana ela, Pwiya, mmunepani mwahu. Munirapihe, orapiha wa Masu, ni maasi a Masu, munikawelaka Ekeekhai.

¹⁶⁷ Anci-ene va ohiy'ula, Pwiya, ni anrowa okhala vaava, aatikinhiwa mwaha wa myaha iya sikhanye sa ekumi. O Muluku, mutthukule ephattuvelo eyo mpaani mwa Muluku, e—ekhanle ya okukutthiwa wahu. Miyo kinvekela, Muluku, wira Nyuwo munirapihe ni munikukutthe Mphomeni Mwanyu, ni munikhalihe soopattuxiwa isya. Ni munivahe mahala ni ikuru, wira niruuhe Masu a Ekeekhai mwa muupululo Aya w'eMuluku wa oMutthu wa Yesu Kristu.

Owo akhumelele ohoolo wahu, Pwiya. Owo arwe ni avonihe iretta sahu, alevellele itampi sahu, asarihe mirima sahu soovoliwa etala ni mihupi sooreera sa ohakalala wuulupale, Ehapari yooreera yowooniheriwa mmakhaleloni mwahu.

Mmureerihe khula pastore, khula muhooleli a masipo, khula mwixuttihi a exikola ya Ttiminku. Munireerihe othene, vamosa, Pwiya, tthiri vekeekhai hiyo ninnoophentani Nyuwo. Nto vano hiyo n'Awinyu, Pwiya, mwa wiivahererya nno. Mwa Nsina na Yesu Kristu, munirumelele vano ntoko othuna Wanyu Yeenyu.

Waamini waka onweha wa Nyuwo,
 Nyuwo Mwaapwittipwitthi a oKalvario,
 O Moopoli a oMuluku;
 Vano mukiiwe okathi onlompaaka,
 Mukumihe itampi saka sothene,
 O mukihye okhuma nihiku nla
 Kikhale othene Awinyu!

Ninnoosivelani nenlo? Nrowe niipe-tho.

Makhalelo yakhala ooriipela,
 Ni oxanka onakirukurerya
 Oh, mukhale Muholeli aka;
 Murukunxe epiphi okhale othana,
 Muukutthe maithori a oxanka,
 Muhikihiye nnakhala kikhumelaka

Ottaiwene wa Nyuwo.

Eyo enniwoonihani oreera? Akavi onaasivela wiipa masipo awo a khalayi? Miyo okisivela paahi. Ankhi nyuwo?

Oh, ninrowa oSiyoni,
oSiyoni, wooreera saana;
Ninrowa oSiyoni,
Muttetth'ole wooreera wa Muluku.

Oh, ninrowa oSiyoni,
Oh, oSiyoni, wooreera saana;
Ninrowa oSiyoni,
Muttetth'ole wooreera wa Muluku.

Murwe, hiyo ninaaphenta Apwiya,
Ni ohakalala wahu osuweliwe,
Mwiitakanxe munsiponi ni mwiiwanano
woosivela,
Mwiitakanxe munsiponi ni mwiiwanano
woosivela,
Ni siiso nirukurerye Ehice ya Muluku,
Ni siiso nirukurerye . . .

Vano, nrowe nivenye vano niipaka nenlo. Nvahane matata mmosa ni mukhwaawe.

. . . ninrowa oSiyoni,

Mureerihwe, munna! Mureerihwe, murokor'aka!
Mureerihwe, munna! Mureerihwe, munna!

Muttetth'ole wooreera wa Muluku.

Nrowe ninvenxerye matata Muluku vano.

Oh, ninrowa oSiyoni,
Osiyoni, wooreera saana;
Ninrowa oSiyoni,
Muttetth'ole wooreera wa Muluku.

Oh, ninrowa oSiyoni,
Oh, oSiyoni, wooreera saana;
Ninrowa oSiyoni,
Muttetth'ole wooreera wa Muluku.

Eyo kheniwoonihani oreera saana? Wulu, wulu! Oh, nrowe nivenxe matata nimuttottopele Yoowo paahi mwa enamuna ahu.

¹⁶⁸ Pwiya Yesu, Nyuwo Ethutu ya Saroni, Ekhokowa ya Mukhatoni, Ettheneeri Yoowaarya y'Oxaka, Ooreeraxa wa ikonto muloko wa mmunepani mwaka. Nyuwo mwa Evirelo ya okhurunuwa waka murima wothene, ovikana ekumi wa miyo! Moota onoophentaahuni Nyuwo! Muniwe, O Pwiya. Moota onooxukhuru-ahuni Nyuwo! Oh! [Nipuro vahiitthu mufiitani—Mol.] Moota onottotopelahuni Nyuwo! Mwaareerihe ala, Pwiya'ahu ooreeraxa ni Moopoli! Munivahe itthu iya, Pwiya. Munivahe . . . ? . . .

. . . vakhiviru va mwiikimanyo,
 Okhale ovuwa waka;
 Mpakha munepa aka okuxiwa khuphwanya
 Omumula omurathhini.

¹⁶⁹ Mwa enamuna emosa, wala ekina, kinnoona wira ninoorowa. . . Yookhala etthu wa hiyo emphwanyaneya ohoolo wene. Vano, muupuwele paahi, kookupali wira kinlaleerya y'eprofeta. Otthapa wuulupale ori ohoolo. Mwaamini. Ti yeeyo. Mirima sinci-ene sooxanka sinookhalihwiwa. . . Miiriirya suulupale sinooleeliheriwa, ni atthu axankale anookhalihwiwa ootthapa.

Vakhiviru va mwiikimanyo, vamwiikimanyo,
 Okhale ovuwa waka;
 Mpakha munepa aka okuxiwa khuphwanya
 Omumula omurathhini.

¹⁷⁰ Ntoko Yohani a khalayi, okathi uuluvalanxe awe wira alaleye, owo aamukilaathi paahi ni okhuwela, kirooleeliwa, ni owerya wawe wothene, "Axinamwane, mphentaneke mmosa ni mukhwaawe!" Mphentaneke mmosa ni mukhwaawe. Muhihiye hat'etthu orwa eriyari anyu, moone. Muhiye sothene, sothene ottaiwene. . . Ayo, khivancala wira exeeni, moonanane yeeyo. Niri mphironi orowa oNinive. Munnona? Muhinwele paketi ole orowa oTarsu, ommukumiha mutthu moopatthanani. Nrowe niwele olukama muro wa iparakha sa Muluku. Kinnaamini wira ninoorowa okhalana. Miyo kinnimwaamini Tith'ihu.

¹⁷¹ Munnoona saana vano, munna? Ti yooreera. Ti siiso onkisivela owoona aana oyariwa, enamuna yeeyo yo ophwanya oxintta.

Kinniwerya wuupuwela miyaakha sivinre, vathi vaava va, moota anci-ene ayariwe aya Momweneni mwa Muluku, vathi vaava va. Moota naasuwelahu vakhani, okathi weemenlyahu va ni isentavo miloko mithanu na miraru mpoolosani mwahu, wira niteke ekereja ni yeeyo! Oh, Awo khwira, "Miyo Apwiya kihaala; Miyo kinoonaaniha othana n'uhiyu." Ni Awo ahiira. Awo ahiira.

Muluku ooreeriheni. Vano nuuramihaka muru ahu. . .

¹⁷² Vano, meelo ohiyu, muupuwele, miteko s'okokhorela sinrowa okhalaniwa mw'awutitooriyu a exikola va. Ni vakhala. . . Vano ninoorowa okhalana mutthu onrowa ophwanyaneya va, wira owooniheke atthu moota wo ophiya weiwo, okhala wira atthu a naanaano animoorwa.

¹⁷³ Nyuwo munnimphenta Owo, mwiire, "Amen." [Muthukumano oniira, "Amen."—Mol.] Oh, Owo kahi oothamaleya?

¹⁷⁴ Miyo kaaphwanyaneya nno okerekhere, ni kiipa nsipo nle na khalayi:

Miyo kimpwanyaneya mukhitte wa Yordani a
mwanankhaya,


Muupuwele, soovira miyaakha miloko miraru, miloko
miraru ni miraru, miloko miraru ni miraru sivinre.

Ni kinnirihela oweha wootthunaxa,
Muttetthe wooreera ni wootteeliha murima
w'oKanani,

Weiwo simphwanyaneya mireerelo saka.

Ni anci-ene kaapatinse aka, ohiy'ule, ari weiwe naanaano va.
Okathi, yaaphwanyaneyaya iwe khukhalela onamoona Ettheneri
ile y'Oxaka ekhuruwaka okhuma wirimu, erukureryaka
siisaale, khwira, "Ntoko Yohani Mpatisa aarummwale awe
wira aruuhe, wira ahoolele orwa woopacerya wa Kristu,
mutthaka anyu onooholela Orwa wa neili." Vaaweryaneya
sayi wuupuweleliwa? Masi, Masu othene a Muluku t'ekeekhai,
Masu othene a Muluku. Ninkhala Ohoolo wa Mwene muulupale.
Muluku ooreeriheni.

¹⁷⁵ Nuuramaka miru sahu, kinrowa onvekela Munna Neville,
pastore ahu oothamaleya, arwe va wira anilaxerye ni mavekelo.

Muluku ooreeriheni, Munna Neville. 

65-0217 Mutthu Ontthyawa Ohoolo Wa Apwiya
Branham Tabernacle
Jeffersonville, Indiana wAmerika

EMAKHUWA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyawe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org